

22

HARVARD COLLEGE LIBRARY  
FROM THE  
HARVARD-YENCHING  
INSTITUTE  
SEP 30 1929

.7.

Ch. L 5570.2928

T 5237.72928

明詩綜卷五十一

小長蘆 朱彝尊

錄

廣陵 楊文鐸

緝評

羅萬化 一首

萬化字一甫會稽人隆慶戊辰賜進士第一歷  
官禮部尚書贈太子少保謚文懿有世澤編

靜志居詩話唐宋科目繁多至明而始終所重惟甲第志科名盛事者  
首述吉水蒲陽而於越山陰自諸文懿大綬而後榜五發邑人居其三  
焉傳聞三公俱同席碑  
之友不可謂非盛事已

擬此日不再得

落景無返輪奔星少回光綠髮不戀人轉眼化為蒼所  
以志士心努力及方剛恒恐歲遲暮蘭蕙不得芳膏火

還自煎山木亦自戕我謀一以乖終身失其臧大道本  
希聲至人貴含章豈其魚目珍而登君子堂登高豈無  
梯濟深豈無航愚者貴速至聖人寶其常虛牖展素書  
古人未云亡無為守躊躇徒貽過時傷

黃鳳翔 三首

鳳翔字儀廷晉江人隆慶戊辰賜進士第二歷  
官南京禮部尚書贈太子少保謚文簡有田亭  
草

告歸發潞河作

方朔恒苦飢相如常病渴明時許乞身初衣弊魏闕革  
車逐扁舟長河接溟渤舳舻爭唱呼鷗鷺閒出沒帆影

日外落棹歌津頭歌舉酒酬暮雲卷簾對夜月悠然萬  
里心頓與江天豁

穆宗莊皇帝發引挽歌

垂衣方在御憑几那堪聞雨暗虞淵日星沉華渚雲周  
宮開翼室漢曲罷橫汾百辟趨蹌地傷心望紫氛

萬曆宮詞

霜毛鸚鵡傍雕闌巧舌依人似結歡白髮宮娃空墮淚  
先皇覓到不曾看

趙志皋 二首

志皋字汝邁蘭谿人隆慶戊辰賜進士第三歷  
官少傅兼太子太傅吏部尚書建極殿大學士

贈太傅謚文懿有潑陽詩集

早發錢塘

曉霧兼天白秋風一葦輕湖吞漁浦闊沙湧固陵平隔  
座吳山送揚帆越嶠迎蒼茫思無限天外忽鐘聲

贈太僕何石川

丈人三徑傍城隈不厭鄰翁日日來雙鶴竹間迎客舞  
一尊池上為誰開采芝合共商山老作賦仍多洛社才  
自笑登樓倦懷土暮天回首重徘徊

王家屏

六首

家屏字忠伯大同山陰人隆慶戊辰進士歷官  
禮部尚書文淵閣大學士贈少保謚文端有復

宿山房集

詩話宋制祖宗翰墨儲藏於玉堂之署觀陳騏中興館閣前後錄道君  
墨跡俱存此康譽之得題年年花鳥無窮恨盡在蒼梧夕照中之句也  
迨元而奎章宣文之閣舊典不改明則藏之大內詞臣末由覩矣萬曆  
九年帝御文華殿宣召入直史臣五人文端居首其餘修撰則沈公懋  
孝張公元忭編修則劉公元震鄧公以讚也既進見示以景陵御筆玄  
兔圖圍以淡墨作滿月胎上有桂子垂伎下藉輦艸兔居其中並臻妙  
境諭諸臣題詩於軸并得用私印識之閱三日詩成進御自首輔張文  
忠外凡三十有五人當日諷詠優游不事促迫綵花銀葉賜予便蕃自  
永宣以來詞林盛事遇此罕矣長陵四馬詩世傳為江陵作今從館課  
集本正之文端立朝侃侃不阿因一諫官力爭去位風節固不可及詩  
亦雍容和雅不  
失正始之音

恭題文皇帝四駿圖

龍駒 鄭村壩大戰胸著一箭都指揮丑丑拔  
箭

天馬徠翼飛龍蹄削玉耳垂筒碧月懸雙頰明星貫兩

明詩餘卷五十一  
三  
瞳文皇將士盡羆虎復有龍駒助神武流矢當胸戰不休  
汗溝血點桃花雨壩上摧鋒第一功策勲何必減元戎  
君不見虎士標題麟閣裏龍駒亦入畫圖中

赤兔 白溝河大戰胸著一箭都指揮亞失帖  
木拔箭

雷鉤鉤北軍來赤兔走黃雲開攬身超夾澗策足絕浮埃  
白溝原頭振鞞鼓貫陳穿營猛如虎穆王八駿詎爲奇  
昭陵六馬應難數百戰間關未解鞍箭瘢還向畫圖看  
只今四海昇平日誰識當年締造難

棗騮 小河大戰著兩箭胸一箭後右曲池  
箭安順侯脫火赤拔箭

紫騮馬金駱月朝刷燕晡秣越俶儻精權奇超驤走滅  
沒當年萬馬盡騰空就中紫騮尤最雄戰罷不知身著  
箭飛來祇覺足生風北風獵獵吹原野長河水澌血流  
赭誰言百萬倒戈中猶有彎弧射鈎者

黃馬 靈璧縣大戰後右曲池著一箭指揮鷄  
兒拔箭

軒后興應龍翔駕天駟乘飛黃迴頭看紫鸞顧影失超  
光君王神武古來少萬里煙塵一劔掃馬蹄蹴處山爲  
摧何論陳暉與平保揚鞭渡淮淮水清金陵父老壺漿  
迎從此華陽休駿足山河重整泰階平

初入翰林自述

生平未知學世路方多岐古人已不作古道猶可追願  
言對青簡澹慮澄玄思宇宙皆吾事一念安可欺譬彼  
機中素皎潔防其緇譬彼山下石孤貞堅自持文章乃  
末技富貴非吾期出入感榮邁朝夕承師資遠心在霄  
漢努力酬明時

玉河新柳

水繞沙隄曲春看御柳眠柔條輕著雨嫩葉暗抽煙影  
落波間細陰垂檻外偏亭亭依漢苑遲日待鶯遷

沈一貫 一首

一貫字肩吾鄞人隆慶戊辰進士歷官少師兼  
太子太師吏部尚書中極殿大學士謚文恭有

喙鳴集

望西城宮殿

莫殿重開寶曆春竹宮長鎖屬車塵煙霞自護祈年閣  
星斗曾傳醮夜辰帳裏流蘇間甲乙爐中寒火憶庚申  
茂陵松柏蕭蕭老無復相如賦大人

朱賡 一首

賡字少欽紹興山陰人隆慶戊辰進士歷官少  
保兼太子太保吏部尚書文華殿大學士贈太  
保加贈太傅謚文懿有集

詩話明制閣臣始入東閣次進文淵閣武英殿謹身華蓋後為建極中  
極獨虛文華殿不拜惟永樂間權謹以孝行拜斯殿學士此後則文懿  
公也是時定陵有意爰立二人先太傅文恪公暨馮文敏琦也蛟門閣  
老丞以密揭止帝曰此二臣皆美器當老其才用之乃改命文懿及文

明詩紀卷五十一  
五  
懿入賈捧各官爭論曠稅難以裁答於是相傳以政府為苦海矣文懿詩不載集中僅從館課錄得一首

薊門行

曠騎窺青海天兵出薊門白艸邊塵暗黃沙塞月昏悲  
笳風外曲哽咽不堪聞

于慎行 六首

慎行字可遠更字無垢東阿人隆慶戊辰進士  
選庶吉士授編修歷修撰侍講左諭德侍讀學  
士陞禮部侍郎改吏部拜禮部尚書入直東閣  
卒贈太子太保謚文定有穀城山房集

公於詩文

春容宏麗一時推大手筆其論古樂府曰唐人不為古樂府是知古樂府也辭聲相雜既無從辨音節未會又難於歌故不為爾然不效其體而時假其名以達所欲言斯慕古而託焉者乎近世一二名家至乃逐句形模以追遺響則唐人所吐棄矣余間為郊祀鏡歌可數十首已而

視之頗涉兒戲亦復不自了然遂焚棄之取其音節稍近者做其一或謂之本調至近體歌行如唐人所假者不曰樂府則詩之而已矣夫唐人能為而不為今人能為而遂為之予奈何不能為而為也其論五言古詩曰魏晉之於五言豈非神化學之則迂矣何者意象空洞樸而不敢凋軌塗整嚴制而不敢騁少則難變多則易窮古所謂鸚鵡語不過數聲爾原本性靈極命物態洪纖明滅畢究精蘊唐果無五言古詩哉余既知其解矣而不能舍魏晉者取其可以藏拙且適所便非能遂似之也海內賞真之士有以吾言為足者吾詩雖不觀可矣公生當慶曆之世又為歷下之鄉人其所論著皆箴歷下之膏盲對病而發藥夫惟大雅卓爾不羣其是之謂乎  
詩話東阿格律和平當正聲微茫之時能為是調即以詩高選亦堪作相

晉陽男子行

隆慶己巳太原丈夫化為女子歌以識之

太原有男子壯烈世所無身長九尺餘白晢好着鬚自  
負良家子募作材官徒腰中鞬韃劍橫擊當路衢并州  
惡少年見之伏且趨一朝覽青鏡倅空堂隅三日不  
出戶忽然見彼姝綽綽芙蓉顏盈盈玉雪膚蛾眉娟且

明詩總集卷五十一  
長高髻墮馬梳脫我金鎖甲繫我繡羅襦掛我白貂帽  
珥我明月珠委心懷嫵婉不惜健兒軀昔爲雲中鶴今  
爲水上鳧昔者一何厲常關十石弧今者何柔曼巧笑  
傾城都仰視浮雲馳變化不須史茫茫窺元運玄黃無  
乃渝世人但云好不必稱丈夫

過雨

五月不知暑虛空颯似秋殘虹掛溪水片雨過城樓遠  
樹斜陽駐深山夕翠流晚涼思枕簟絕愛北窗幽

秦淮

秋月秦淮岸江聲轉画橋市樓臨綺陌商女駐蘭橈雲  
裏青絲騎花間碧玉簫不知桃葉水流恨幾時消

送朱養淳太史冊封周藩

蓬萊闕下五雲飛桐葉封函出帝畿漢苑花香隨使節  
河橋柳色上征衣天臨玉署恩偏渥星近銀河夜更輝  
試向天津橋上望銅街無處不芳菲

送張洪陽學士請告南旋

長河南下水曾波吳楚青山枕上過行到潯陽江口望  
應憐秋色故園多

少年行

錦帶珠袍綠臂鞬相逢盡說富平侯南山夜獵春城晚  
繫馬新豐舊酒樓

陳于陞一首



于陞字元忠南充人隆慶戊辰進士歷官太子  
太保禮部尚書文淵閣大學士贈少保謚文憲  
有萬卷樓橐

宣廟御筆馬

寶繪傳神駿權奇尺素收蹄攢雙碧玉文散五花虬赤  
汗當沾臆黃金為絡頭天閑今萬匹何必按圖求

張位一首

位字名誠南昌人隆慶戊辰進士改庶吉士授  
編修遷司業以糾江陵奪情謫徐州同知後累  
官少保兼太子太保吏部尚書武英殿大學士  
謚文端有叢桂山房彙橐

詩話文端以持正忤江陵詩頗有憂危之語其詠射鵠云方寸能幾何  
當此亂鏃投有感其言之也既罷相於東湖杏花村建閒雲樓吟眺自  
娛晚探青原之勝汎舟螺川野服篋車登覽竟日老僧不識為宰相  
題詩懷鄒魯瞻門人胡廷宴守吉安從寺壁見詩始知之是亦佳話

七夕

塞月催砧急天風襲袂深星河良夜色牛女隔年心  
逕流螢度花陰促織吟平生江海意荏苒二毛侵

裴應章一首

應章字元闇清流人隆慶戊辰進士歷官南京  
吏部尚書贈太子少保謚恭靖有嬾雲集

豐嶺即事

倚杖危峰上煙霞嶂幾重逶迤盤古道絕勝引仙蹤露  
滴晴天雨雲低半嶺松蓬壺何處是天際一聲鐘

明詩紀卷五十一  
范謙一首

謙字含虛豐城人隆慶戊辰進士歷官禮部尚書贈太子少保謚文恪有雙柏堂集

初入翰林自述

聖人啓元運應龍協昌期萬物快先覩而我逢茲時抱策獻天門鴻漸修羽儀木天肆宏敞玉軸陳參差石渠發中秘虎觀探幽奇淵源接師友得失隨箴規分陰期共兢古道還力追願言謝紛華兼以息驅馳但令微忠效無求虛譽垂庶幾大造化於以酬毫釐坐見乾坤泰我亦贊無爲

習孔教一首

孔教字時甫廬陵人隆慶戊辰進士選庶吉士

歷官南京吏部右侍郎

將進酒

將進酒客莫辭玉交杯金屈卮主人勸客揖且讓客言我飲本無量有如法宮置酒監在前史在後此時徑醉不及一斗州閭之會六博投壺男女雜坐盱眙歡呼爾時醉可兩壺日暮酒闌合尊促席履舄交錯杯盤狼藉羅襦襟解微聞薌澤當此時也能飲一石欵戲乎酒極則亂樂極則悲萬事盡然高陽之徒安足爲書有豐刑亦有酒誥舌出禍入君子所悼主人休矣職思其居三爵不又言毋我渝

田一儁 一首

一儁字德萬大田人隆慶戊辰進士歷官禮部左侍郎有鍾台遺橐

遲鄭郎不至

幽齋淨朝塵崇館紛晝靄涼葉陰已深疎花落猶在美  
人來不來搔首空相待渺渺望河干青山出雲外

韓世能 一首

世能字存良長洲人隆慶戊辰進士改庶吉士  
除編修歷修撰侍講右諭德陞國子祭酒南京  
禮部侍郎召入兼侍讀學士有雲東草

送友人南還

垂柳千條拂御溝上林春色鳳池頭如何張翰多歸興  
不待秋風已倦遊

沈思孝 四首

思孝字純父嘉興人隆慶戊辰進士累官都察院右都御史兼兵部侍郎贈太子少保有行成  
郊居西征陸沉諸橐溪山堂吾美堂等集

詩話先生封事尤觸江陵之怒杖畢即加錄鑣復下獄三日始僉解發  
戍既抵嶺南巡撫欲殺之以媚政府遽以尺符召之行至恩平先生袖  
匕首示縣令曰巡撫必欲殺我我當與俱斃不然伏尸軍府中令天下  
士大夫皆知巡撫所殺也縣令密以告巡撫得不死蔡副使文範作壯  
哉行送之其歸也胡元瑞贈詩云豈惹花前千里夢枕榔樹下十年人  
先生頗好鑒賞書畫言者遂劾其以千金市王右軍真蹟一卷南箕貝  
錦可以意成也詩入瑯琊四子之列晚交姚叟士彝未免間作齧牙語

喻邦相同俞羨長至集恕醉軒

白雲邀上客黃葉繞貧居  
缸面沽來酒槎頭釣得魚  
山川連越絕雞犬數秦餘  
一日千秋意相看老不疎  
思家

長臥鳳城隈鄉心日夜催  
小人猶有母明主漫憐才  
木葉千山雨江湖八月雷  
倚閭秋欲盡底事不歸來

清寧兩宮災臣督諸軍入救  
上使小黃門賜以肴  
四合酥與果稱是中有鳳仙橘  
小紅梨佳甚乃藿  
食者所未嘗敬賦此紀之

春盤分尚食天語遣黃門  
橘豈維揚貢梨堪大谷論  
股肱悲未竭口腹媿知恩  
獨荷焦頭賞能無負至尊

出都門

天高落葉繁匹馬上東門  
固寵寧臣節完名是主恩  
青雲霞闕迥綠野幾家存  
滿筐匡時草攜歸覆酒尊

賈三近一首

三近字德修嶧縣人隆慶戊辰進士選庶吉士  
改授吏科給事中轉戶科都給事中遷太常少  
卿改督四夷館歷大理左右少卿南北光祿寺  
卿以右僉都御史撫保定入爲大理寺卿轉兵  
部右侍郎有東掖漫橐

于無垢云石葵歌詩  
清爽疎宕咳唾立成

冬日登嶽

遊日高寒處羣山擁岱宗  
登封迷漢艸徒倚有秦松  
萬壑煙嵐合諸天紫翠重  
肩輿明月下上界已聞鐘

邵陸一首

陸字世忠餘姚人隆慶戊辰進士改庶吉士歷官刑部左侍郎

過拜將臺懷古

千載遺踪表故臺殘雲縹緲夕陽閒三川佳麗興王地百戰勲名大將才此日江山空草木當年壁壘半蒿萊登臨不盡英雄恨風急寒沙過鴈哀

沈懋孝一首

懋孝字幼真平湖人隆慶戊辰進士改庶吉士歷南京國子司業謫兩淮鹽運司判官起河南巡撫未任有淇林雅永

詩話晴峰樂府句摹篇傲不脫歷下窠臼餘體斐然能於同中見異

北固登望

北固樓前一笛風碧雲飛護建康宮江南二月多芳艸春在濛濛細雨中

朱孟震四首

孟震字秉器新淦人隆慶戊辰進士除南京刑部主事歷郎中出知重慶府陞河南按察副使累官通政使以右副都御史巡撫山西有郁木

生全集

任少海云使君詩閱壘瀟灑了無塵俗氣 陳于韶云秉器才情婉附流調壘發若孤桐朗玉自有天律 張助甫

云秉器詩爾雅深厚緣情達理 吳明卿云秉器負用世才以餘力為詩諸體錯陳意匠所極才亦副之 陳玉叔云秉器詩本於才體氣高妙

詩話乘器津津以詩家自許其在南曹結清溪社一時名士聲應氣求  
所緝楮談續談餘談述先詰之舊聞綜同人之麗句可謂好事也已

和答正甫

幽意苦不愜清歡良未期如何汾水上忽枉故人詩芳  
草王孫路朱華帝子池相思隔年歲河漢正高垂

哭孔汝錫先生墓

殘歲龍蛇逼新阡雉兔過露隨朝槿盡風入暮蟬多坐  
失千鍾酒情傷九辯歌夜臺無白日一慟欲如何

春日金沙寺訪羅孝廉元我

春水金沙是舊遊春風黃鳥况相求馬蹄一逕穿雲入  
花氣千林帶雨浮詞客雄文巴蜀檄故人清興剡溪舟  
草堂踪跡今猶昔好爲狂夫十日留

謁張桓侯廟

英姿颯爽氣雄哉恍惚晴霄風雨來一代君臣元伯仲  
千秋祠廟倚崔嵬乾坤已限三分業熊虎空懷上將才  
正是雲安春月夜杜鵑啼徹不勝哀

龔勉一首

勉字子勤無錫人隆慶戊辰進士除嘉興知縣  
以憂歸補吳橋知縣陞南京刑部主事轉戶部  
員外進郎中出知嘉興府遷浙江叅政轉按察  
使調山東遷浙江右布政使有尚友堂集

彭子殷云子勤

詩整暢可方錢劉

送王會泉武庫出守永州

仙郎戎政擅才名簡命熊幡向楚城車騎舊瞻司馬節  
檐帷新識使君旌九疑南接湘江遠五嶺東連粵路平  
遙想行春風日好瘴煙消盡百花明

蔡文範 十首

文範字伯華瑞州新昌人隆慶戊辰進士歷官

廣東布政司叅議有縉雲齋藁甘露堂集

詩話青門近  
體雄渾絕倫

自瀛德至東昌道中雜詩

聞道張秋決先朝慮獨深爲山名戊巳奉使火辛壬地  
控支祈鎖天寒象罔沉誰知神禹跡疏鑿本無心

岳州馮觀察見招

澹澹鋪湘水依依見武陵雲隨天不動川靜水凝冰魑  
魅愁神鼎魚龍怪佛燈夜深清梵徹何異普陀僧

太和宮

疆域連秦塞星辰入楚都英靈天地啓宮闕古今無禪  
艸諸儒遜玄功萬國趨祠前瞻阜燾曾說贊文謨

送庫部朱陽和備兵甘肅

陰山雪墮紫貂裘使者行邊大漠秋陝右長城班定遠  
胸中武庫杜荊州風吹獵火通甌脫遂奏梅花落隴頭  
哈密至今無敢論知君躍馬看吳鉤

紅心驛值雪

雪色初驕冷萬家那堪風急更迴斜來從朔北還兼雨

去到江南定結花沙上紫騮嘶不度愁邊青鬢忽先華  
荒村日暮平如練破却寒光數點鴉

遊南岳 二首

縹緲仙臺紫氣浮煙籠玉座儼垂旒地包荆楚標南紀  
江合沅湘向北流牲帛千秋周祀典衣冠五月舜諸侯  
塵緣未斷慚仙骨金簡雲書何處求

赤帝高居小梵天衆峰羅列擁堦前秋經絕壁風雷起

有風雷洞

醉倚雙臺日月懸

上有望日望月二臺

誰道人騎黃鶴去我今

寒抱白雲眠莫言此夕非冲舉已隔人寰丈九千

誌載祝融峰高

九千丈有奇

寶應湖

湖闊疑無地堤長亘若虹孤舟數點雨殺却日南風

望白鶴嶺

百里初見近十里轉見遠絕頂不分明白雲時舒卷

溪漲發建陽

白日欲沒雲濛濛建陽城外雨澆空溪邊怪石不知數  
一夜走入洪濤中

顧大典 三首

大典字道行吳江人隆慶戊辰進士歷官福建

提學副使謫禹州知州改開州有清音閣集

得山東觀察報留別省僚

肅肅晨風吹明星帶徂兩平生攜手俱今乃殊風壤大



江一以遠日夕春潮長憶奉南皮游良時清尊賞華篇  
想遺則淵調懷餘響朋僚旣雨散世路即塵鞅去去不  
可追臨風徒曠况

苔溪春日

苔溪春深春欲歸柳絲拂地梨花飛客子辭家已三月  
春風初換越羅衣羅衣競試春江曲花外鶯聲斷還續  
春心羈思兩相催愁見天涯春艸綠春艸年年伴客程  
扁舟明日又孤征故園回首春雲隔江上春風空復情  
送秦郡倅還楚中

一朝辭簿領千里返江湘棄置君何罪離群我自傷春  
風過夏口秋艸臥衡陽爲報南來雁音書好寄將

沈位

三首

位字道立吳江人隆慶戊辰進士改庶吉士授  
檢討有柔生集

詩話虹臺詩麗以則惜不  
永齡中秋結語殆成讖也

十二月二十一日獻俘

睿德通中夏天威震北隅遐方歸正朔欵塞獻新俘清  
廟陳弘業彤庭顯秘圖五兵原不戰巨寇已行誅將相  
多酬賞寰區盡大酺小臣叨侍從率武詠神謨

中秋

秋光長與翠華連况是中秋更可憐城闕影高雲裏見  
芙蓉露冷沼中妍誰家笛弄江南曲幾處鴻飛塞北天

此夜清輝應莫負人生能見幾回圓

漁陽春望

二月春方半冷風日正長陌頭看柳色忘却在漁陽

張鏜一首

鏜號石渠吉安永豐人隆慶戊辰進士除東莞知縣升南工部主事歷員外郎中出為湖廣按察僉事轉貴州參議

寄艾和甫謫戍西寧

荆南偶接故人書為悉關門近起居萬里獨看營外月  
孤身誰念釜中魚辭劉徐恕心元苦折檻朱雲願不虛  
秦地日聽邊塞曲楚歌相和調何如

喻均四首

均字邦相新建人隆慶戊辰進士歷官天津兵備副使有山居集

陸中丞移書促入郭有事田間詩以陳情

龐公願負耒陶令甘荷鋤外物既不干誰能逸其軀朝  
夕課童僕黽勉在田廬心事異昔人踪跡與之俱咄嗟  
不逢年高原化為渠穡事良已矣種豆山一隅羣雀苦  
交啄持竿為毆除詎意小臧來乃接中丞書要我入城  
郭高義有誰如顧念山中人生事各有須寧能舍田畝  
忽此升斗儲殷勤謝來意禮數寬樵漁

春暮宿大觀樓簡士功及二三知己

閒居不適意觸事增煩憂振步出西郭登君江上樓滄  
波漲初闊綠樹陰已稠煙雲綴遐岫蘭茝盈芳洲迥覺  
心迹清轉見身世浮徘徊未能去衾枕聊淹留既以自  
怡悅因之報舊遊

送方子及入計

凝霜沾浦樹冉冉歲欲晏君子意如何垂老仍薄宦一  
臥艾子城六見秋花綻月米分故人日食藜與覓高志  
慕翔鸞卑棲託片鸚發軌謁承明蚤晚流皇盼白首感  
睽離追餞臨寒澗握手慙無言側睇雲間雁

請告書懷

夙昔浮雲意微官久欲休蹉跎身漸老丘壑願方酬海  
日猶殘暑山風欲度秋盈盈河上水萬里送歸舟

方 沆 二首

沆字子及莆田人隆慶戊辰進士歷官雲南提  
學僉事謫寧州知州有猗蘭堂橐

朱秉器云子及詩  
非大曆貞元以上

語不道 謝山子云子及  
心境高妙有天然之趣

秋汎

山合松楸晚沙寒橘柚秋坐看魚鳥近歷歷鏡中遊  
次長沙懷賈太傅

楚雲萬里望京華賈傅南遷路未賒誰料逐臣今更遠  
春風三月過長沙

唐文燦 一首

明詩紀卷五十一  
文燦字若素漳州鎮海衛人隆慶戊辰進士除  
行人歷官廣西按察僉事有鑑江亭集

大行皇帝輓歌

憶昔河清日流虹叶瑞徵運隨真主轉紀逐盛時蒸七  
世觀新廟千秋奉永陵耿光長照耀史冊紀中興

郭莊一首

莊字子蒞鞏昌徽州人隆慶戊辰進士改庶吉  
士授山東道御史督學南畿

賦得謁帝承明廬

丈夫重意氣束髮事周遊挾策日坎壈西風吹敝裘一  
朝際風雲謁帝來神州出入承明廬交結盡英流雙闕  
聳雲漢朱旗夾道周翱翔供奉客錦帶佩吳鉤相期樹  
勲名寧論沉與浮君看黃鵠志不爲稻粱謀

帥機一首

機字惟審臨川人隆慶戊辰進士歷官南京禮  
部郎中陞思南知府謫兩浙鹽運司副遷南京  
刑部郎中有膳部集

秋懷

八月金氣深蕭瑟叩虛牝梧楸半離披朱華日就墮風  
急度離鴻氣嚴感飛隼皎月正舒遲羲輪漸縮窘砧聲  
動四鄰薄寒侵席筍清景誠足嘉惜此歲適盡况復愴  
松楸欲賦思歸引

鍾庚陽一首

庚陽字長卿秀水人隆慶戊辰進士除太平推  
官入為大理評事遷工部主事歷負外郎中出  
知鎮江府謫知廣德州終刑部負外有焚餘集  
劉在南直指遷郴州余亦謫守廣德同發潞河投  
贈  
繡衣使者下蘭臺愁說雙旌潞水開自是聖恩寬逐客  
却從謫宦見仙才山過衡嶽孤帆轉路入瀟湘鴈影回  
余亦南行賦歸去秋風天末幸追陪

唐邦佐

二首

邦佐字惟良蘭谿人隆慶戊辰進士知泰和如

皋儀真三縣入為刑部主事謫兩淮運司判官  
轉贛州府通判遷知光州有比部集

感興

蟠曲惡木根不植太山岡婀娜孤生竹抽梢淇水旁佳  
人好脩飾被服素羅裳感茲帛鴈會得充君子房絲蘿  
引長蔓琴瑟淨高張合懽在令德容色豈足揚

塞下曲

曾隨驃騎度渾河雨雪天山夜負戈莫謂歸家貧到骨  
黃沙白骨不歸多

張元忬

一首

元忬字子蓋紹興山陰人隆慶辛未賜進士第

一歷官左諭德兼侍讀有不二齋橐

杜轄巖訪吳公度

杜轄巖中人曲江舊同席未折彭澤腰早著東山屐  
心老氏書結廬武夷側晴峰萬點青雲溪幾條白玄關  
夾長松丹房架危壁巖頭露可餐巖下芝可摘猿鶴時  
為羣車馬杳難即我本丘壑人聊作金門客煙霞夙同  
好出處偶殊迹諦觀聲利場何似神仙宅四十已無聞  
百年亦瞬息徒然赤松子巢居鍊形魄明發出閩嶺題  
詩訂泉石

鄧以讚 一首

以讚字汝德新建人隆慶辛未賜進士第三歷

官吏部右侍郎贈禮部尚書謚文潔有佚橐

思歸

星河雲氣淡萸菊露華清宦况慵兼病鄉愁斷又生入  
秋偏遠夢逐日計歸程南鴈空中唳能禁此夜情

郭子章 二首

子章字相奎泰和人隆慶辛未進士歷官都御  
史巡撫貴州進兵部尚書有閩州留州蜀州浙  
州晉州楚州黔州等集

詩話青螺跋歷外臺而著書不輟  
詩嫌合格者少然勝於輒熟者多

紀夢

西南欖槍明占在川之播何哉井底鼃不知有漢大黔

中久愉恬崇朝忽摧挫聚黨嘯綦江一倡乃百和城市  
走豸豸平原起堀堞天子赫斯怒命將出右个猥予在  
田間未許支離臥馳驅竹王疆迅速等轉磨夜夢壯繆  
侯車騎儼相過倒屣延之入席分賓主坐論賊無足虞  
糝糠易揚簸巢幕暫偷安積薪以待莖及余入八番次  
第密搜邏衝風籜乍卷利七粉同判豈專帷幄謀一一  
神所佐從此半壁天蠻熨始退愞初祠敬事侯擊牲進  
香糯誰爲報侯功銘詩我所作

舟中

三春滯水瀆魚鳥狎成羣江濁流新雨山晴斂薄雲村  
春幽澗急岸艸夕陽薰何處城頭角偏令倦客聞

劉克正

一首

克正字懋一從化人隆慶辛未進士改庶吉士  
授簡討

春雪

乍覺輕寒薄太空凍雲舞絮一宵同點成簾幕渾成雨  
飛入園林不待風萬里江山春寂寞九重宮闕玉玲瓏  
仙郎天下聞高調一曲誰能和郢中

郭子直

一首

子直字舜舉崇德人隆慶辛未進士除行人歷  
官福建按察副使

采菱曲

采菱復采菱采采日已暮貪看馬上郎迷却花間渡

侯堯封

二首

堯封字欽之蘇州嘉定人隆慶辛未進士授刑部主事改四川道御史歷官福建參政有鐵菴遺橐

第一禪林

自是禪栖第一林萬松迴合白雲深遠看麋鹿不知數  
欲問禪居何處尋中天日月遞朝暮下界山河自古今  
暫憩便疑塵世隔幾人曾此一投簪

詠石牛

田入山鄉少時將孟夏終如何尚高卧不起助農功

劉元震

一首

元震字衍亨任丘人隆慶辛未進士歷官吏部左侍郎掌詹事府教習庶吉士

月下聽琴

明河澹月挂疎林此夕張君綠綺琴一曲正堪清夜聽  
幾人先動故園心寒催兔杵霜前響靜愛龍脣泓下吟  
流水高山意何限遙遙天路彩雲深

黃洪憲

五首

洪憲字懋忠嘉興人隆慶辛未進士改庶吉士除編修奉使朝鮮還進侍讀歷右庶子陞少詹事掌翰林院事有碧山學士集



觀蘭亭修禊圖

夙昔秉微尚縱情寄丘壑晞髮秦稽陽俯觀但寥廓蘭  
亭被荒丘羣賢不能作風生松下寒月出雲上薄觴咏  
已無歡墨妙虛有託崇峻迹未殊清朗又如昨彭殤誰  
見齊庶幾達者樂

穆宗莊皇帝輓歌

二首

祇德符神禹成功紹帝堯冠裳臨萬國干羽格三苗碧  
嶂龍輶入青林鳳翥遙淚痕消不盡斑竹日蕭蕭  
魚鑰開清禁鑾車出紫薇忽移丹仗去空憶翠華歸天  
路應非遠人寰惜永違霸陵秋色裏愁見白雲飛

山海關

長城古堞俯滄瀛百二河山擁上京銀海仙槎來漢使  
玉關秋艸戍秦兵星臨尾部雙龍合月照平沙萬馬明  
聞道遼陽飛羽急書生急欲請長纓

別許都監

萍水他鄉聚多君傾蓋懽九秋迎使節千里送征鞍久  
客歸心切孤亭別袂寒遠星江上落殘月馬頭看豈不  
懷瓊玖無因託羽翰相思不得見努力且加餐

劉虞夔

一首

虞夔字直卿高平人隆慶辛未進士改庶吉士  
歷官太常寺少卿兼侍讀學士掌翰林院事再  
掌詹事府

苦熱行

燕山虛傳千丈雪昔乃苦寒今苦熱苦寒尚可禦苦熱  
安所逃寒有重裘奧室足自庇熱雖袒裼心煩勞炎風  
吹埃沸四野火雲布空日如赭長安袞袞車馬塵驅馳  
道路何爲者吾思仙人乃在閬風岑水晶宮闕琪樹林  
安得從之御風吟攬子之袖開我襟念此已足清人心  
吁嗟炎蒸三伏無歲無發狂大叫胡爲乎

周光鎬二首

光鎬字國雍一字耿西潮陽人隆慶辛未進士  
除寧波推官陞南戶部主事改吏部歷郎中出  
知順慶府陞四川副使轉叅政遷陝西按察使

擢僉都御史撫寧夏入爲大理寺卿有明農山  
堂彙艸

大梁道上

眺望中原路透迤入大梁風塵馳朔騎節序改青陽衛  
水浮煙黑沙河落日黃愁來看短缺猶帶薊門霜

秋懷

靈關秋色白榆多九月霜風黑水河天外雁鴻嗟阻滯  
籬邊松菊怨蹉跎南來邛塞無烽燧西去臨洮走橐駝  
此日三秦憂不細禁中親詔出廉頗

吳中行一首

中行字子道武進人隆慶辛未進士改庶吉士

授編修以建言廷杖為民尋起用遷右中允歷  
洗馬管司業事進侍讀有復菴集

詩話江陵奪情事在萬曆五年七月迨十月之朔彗星見大內火於是  
既望三日吳公疏上次日趙檢討用賢疏上又次日艾負外穆沈主事  
思孝疏上江陵怒不可止而諸公均受杖矣方杖時鄒進士元標疏復  
上一時士氣持正若是許文穆以庶子充日講官為吳趙二公餞鐫玉  
杯一銘曰斑斑者何卞生淚英英者何蘭生氣追之琢之永成器以贈  
吳公犀杯一銘曰文羊一角其理沉黜不惜剖心寧辭碎首黃流在中  
為君子壽以贈趙公玉杯今不見犀者為  
吾鄉何少卿絃音所得余嘗飲此作歌

### 賦得露凝仙掌

絳闕秋容靜金莖露氣長夜深方湛湛日出轉漾漾共  
喜仙人掌能漚玉女漿願持方聖澤沾灑徧遐荒

史 鈞一首

鈞字汝和餘姚人隆慶辛未進士改庶吉士授

### 編修

春晴

春光二月滿皇州半逐桃花入水流何事王孫歸未得  
東郊芳艸自含愁

丁元復一首

元復字見心長洲人隆慶辛未進士除知陽信  
縣擢山西道御史歷浙江布政司叅議有片玉  
齋存橐

早春過趙凡夫池館

幽栖何所定選勝得支硎檻底泉鳴玉天邊石作屏江  
梅依磴戶谷鳥浴清泠千丈原頭瀑宜添一艸亭

鄭邦福一首

邦福字洪疇上饒人隆慶辛未進士歷官南京太僕寺卿有采真遊橐

牛場坡

俯身牛場坡仰而臘笳嶺白鷄名山帶雨翔老鴉名關入雲  
猛如穿螺竅中復躋蝸角頂行地雖數舍計天不盈頃  
從來汗漫遊觀茲殊絕景那知陟宦階巖嶮極無影

吳中立二首

中立字公度浦城人隆慶辛未進士授禮部主事歸籍起尚寶司丞有吳音

浪吟

楚歌鳳兮鳳孔操麟乎麟空為世所瑞胡不全其真三  
山有若木百歲無故人去覓逍遙子清湘采白蘋

舟行白下

江天澹秋色斜日照孤篷漁艇沿門繫蒹葭到處通鳥  
飛帆影外人在鏡湖中始覺煙波叟浮家趣不窮

薛夢雷二首

夢雷字汝奮福清人隆慶辛未進士歷官雲南按察使有彩雲集

發三山

倦遊萬里欲投閒未斷塵緣更出關七十五程重屈指  
夢魂何處不三山

夜次弋陽

風塵何事只棲棲楚水茫茫去鳥低落日漸看人影盡  
平沙如雪弋陽谿

熊敦朴 一首

敦朴字茂初內江人隆慶辛未進士改庶吉士

歷官貴州布政司叅議有謫居橐

得趙汝師太史書

章臺猶旅食珍重故人書自是飄零久非關記憶疎野  
花紅更發官柳綠仍舒浩蕩乾坤意吾生總不如

馮時可 七首

時可字敏卿松江華亭人隆慶辛未進士除刑

部主事改兵部歷負外郎中出為貴州提學副

使再補四川提學副使調廣西湖廣叅政有北

征西征金閭石湖巖棲雨航等集

陳臥子云吾鄉元成可方吳門劉子威

詩話元成詩極為

所詆就全集而觀甫田彌望稂莠汗

萊獨五古一體尚有遺棄滯穗可供捃拾以比劉子威翻覺勝之

齋居雜述 二首

兔狡能營窟鳩拙亦居巢兕虎入帝苑麒麟走空郊玉  
石貌難分金錫質易淆三黜不必愚九遷豈必豪屈伸  
由好惡人生在所遭鴻也費歌噫雄也費解嘲何如與  
化遊小大並逍遙

白龍下清淵漁者射其目白龜使清江卜者剗其腹元  
君違神夢上帝惡魚服風波一失所雲雨迷牽復芳艸

明言卷五十一  
化爲芻苦菜菹爲蓄世事如轉蓬人情多反覆冉冉百  
年中愁居何能淑

戊戌歸田雜感 二首

箕斗不共垣有采相爲光蘭蕙不共根有氣相爲芳奈  
何同居者各自生肺腸一笑亦見疑片語含鍼鏃不能  
相慰勞安望相頡頏長林知天風大埜知天霜人生不  
相知何用接杯觴

北風何其涼霜霰相與期薄暮侵衆卉芳鮮漸已辭玄  
髮不堪秋忽覺變青絲翩翩飛蓬征愴愴遊子思浮雲  
一出山安知其所之故交皆已貴故心誰爲持酌水置  
金壘焉辯澠與淄

送張孝豐

浮雲不可駐遊子不能留驚飈逐駟歲月去何遒禦  
寒安得裘濟河安得舟客處無與懽寧不思故丘

常山道中遇雨

東山詠零雨感彼歸途事今茲賦愁霖行役我伊始霖  
蠶業不堪滂沱末由止嘽嘽石彌高油油雲未已我車  
淖方掀我僕顛莫起蝟蝟蠋蒸桑肅肅鴉集枳苦哉遠  
征人重山復重水

建陽道中

趨程苦行遲遇景苦行速清晨發建陽重霧若雲簇載  
馳且一舍始能豁我目清溪映明沙茂樹間修竹千山

開且合煙翠爭相逐飛梁若垂虹去艇如遊鷺竟日抵  
甌寧應接難更僕人遠意如何良遊偏恨獨

方揚一首

揚字思善歙人隆慶辛未進士歷官杭州知府  
有初菴藁

金山

虛閣疑無地琳宮別有天江空萬籟發僧定一燈懸七  
澤吞吳楚孤峰自歲年乘風興不淺高眺已泠然

劉伯淵一首

伯淵字靜之號念庭慈谿人隆慶辛未進士除  
泰興知縣遷工部主事歷負外郎中出為江西

按察副使以病致仕歸年百餘歲卒有灌息亭

集

詩話念庭於隆慶五年釋褐萬曆十六年即引疾歸其八十初度自嘲  
詩云謂我歸田早假令不早有何好幾人欲歸不得歸黃犬東門添懊  
惱謂合彈冠出陶令折腰八十日投閒已道宜休三揣分真成不堪七  
及百歲思陵遣御史梁雲構存問念庭猶健步迎於門外謝恩畢騰觚  
飛爵了無倦容崇禎十一年事也吳興有顯者家居以厚幣乞言  
介壽念庭笑曰七十上壽母乃太早乎浙東西相傳以為佳話云

園居

松際茅簷隔小橋水濱穿圃亦通潮得閒獨坐翻書卷  
有客相過慰寂寥方竹歲深裁作杖大壺霜落剖為瓢  
年豐飽喫青精飯莫問仙山路近遙

吳丕顯一首

丕顯字希文松江華亭人隆慶丁卯舉人承天

府通判有四留軒集

詩話希文奕葉青門一官散吏廉能著聞相傳初補學官弟子製青苧布為襴衫授兄子太僕炯以及孫曾家有青苧亭至今存焉襴衫之製諸生服之洪武二十四年三易其式而後定用玉色絹布為之寬袖皂緣繫縑垂襦其後漸易以藍罕用布者矣

題襟江樓

纜解春江曉帆懸碧樹秋開窗千里月近檻一江流草色迎芳渡歌聲逐去舟十年湖海夢猶自媿沙鷗

鄭學醇 一首

學醇廣州順德人隆慶丁卯舉人選授知縣有

勾漏艸

園居

藥裏供垂老幽棲性獨偏每尋高士傳無復遠遊篇柔

櫓村煙外寒江夕照前沙鷗我與汝相對可忘年

劉元卿 一首

元卿字調甫安福人隆慶庚午舉人徵授國子

監博士遷禮部主事有山居草

別王以忠

王粲樓前賦梁鴻廡下居死生奚不可歸去復何如計日浮炎海經時返故廬憑將越溪水還寄八行書

梁岳 一首

岳廣州順德人隆慶庚午舉人官知州

暮春燕京懷歸

長安春盡落花多越客思歸意若何節序幾從愁裏變



家園頻向夢中過西京形勝雄三輔北雁音書隔九河  
燕市酒鑪堪取醉莫將留滯起悲歌

明詩綜卷五十一

明詩綜卷五十二

小長蘆 朱彝尊 錄

小湖 高不騫 緝評

李應徵 三十首

應徵初名衷毅字伯遠嘉興人萬曆癸酉舉人  
選授臨安教諭陞南國子博士有青蓮館澄遠  
堂偶寄軒藿園寄茗薊易河梁兩都汗漫遊諸

集

皇甫子循云伯遠肆力風雅律詩時似少陵而風骨師心太白  
彭子殷云伯遠詩頓挫激昂跌宕飛舞若鞭赤虬轡蒼螭而上下

彩虹碧落之間 鄧遠遊云伯遠意取師心法必摹古其于諸體無所  
不工亦靡所不合 黃貞父云伯遠詩雄沉俊爽如驃騎之師不設刁

斗而肅然不可犯 鍾廣漢云先生早察孝廉以才望自高既艱于一  
第老就四門博士其詩取材開竇匠法弘正是時七子之習變為叫呶

公安之派漸已淫永先生激彼頽  
波力返正始閎麗悲壯卓然成家

靜志居詩話弇州標榜前後五子而外廣為四十子若似乎此外無遺  
賢矣說詩者遇隆萬朝士或置不觀直以公安景陵繼七子之派即  
之論亦不免焉不知隆慶諸臣已力挽叫囂之習歸于平澹而定陵  
初年人皆修辭琢句出入風雅之林若吾鄉李先生伯遠若下鄭先生  
允升吳中歸先生季思嶺南區先生用孺尤卓然名家而閩中徐惟和  
謝在杭曹能始均不為楚咻所奪未見萬曆初之不及嘉靖季也學者  
取諸家詩誦之庶  
幾論世有權衡矣

### 吳門逢袁履善先生却贈

涼風起蘋末落日開中園寒蟬聲嘒嘒飛鳥何翻翻顧  
逢雲間叟而同江上言我昔與君別遠涉長水原今日  
復見君乃在吳閶門閶門鬱雲興流焱激飛軒攜手登  
茲樓時以散憂煩明月皎夜光有酒盈我尊開尊飲君  
酒寸心聊復論丈夫重意氣迹遠道自存何必齊年齒  
然後情誼敦願將結佩贈媿無雙瑜璠

### 八月十四夜赴沈中丞純甫約與范倩東生泛月 之茗上

顏照忽已匿閒夜增離情涼風扇薄帷白露塗中庭詠  
彼蟋蟀唱眷言懷友朋佳期及三五圓景將漸生素書  
忽見招方舟鷺前汀薄煙斂層霄皎月雲間升驚鵲旣  
飛遶來鴻亦哀鳴流輝照衣裳坐見秋江澄爽氣蕩瀾  
澳冲魄涵虛明屬林方候滿委照知戒盈且勿論居諸  
杯酒聊共傾芳洲思紉蘭極浦聞采菱不寐望所歡悠  
然見菰城良覲在明發庶以慰深盟

### 寄御史大夫沈公純甫

誰謂芝桂芳指作菘與蕒誰謂西施妍而不如宿瘤姬

公避流言孔父蒙虜裘鳳德故不衰仁物竟奚尤睿鏡  
有餘照慈杼無妄投亮懷百鍊操繞指非所謀勿以入  
室故競彼戈與矛讒口任叟叟鎮之以休休泰山摩蒼  
天不辭堙與丘滄海百谷王涓勺鮮棄流桃李故不私  
藥籠亦見收交親誼所敦申言副咨諏

題清音閣贈朱君采

君采天下彥乘時奮遼廓身雖在軒冕志不忘巖壑朝  
謝桓氏驄暮羅翟公雀結樓臨青苔憺焉守玄漠一水  
旣當戶衆山亦羅郭俯瞰激清泠仰熙矚崖峩曠然招  
遠風蕭疎振林薄并入山水間情境兩寂莫綠尊時時  
開清言復閒作心期契鴻冥世變付龍蠖達人操其權  
神理或可託

秋夜歸自茗水泛月鶯脰湖寄沈子勺

朝辭若下城暮驅笠澤舩景物忽已改川原亦邈緬娛  
目惟清暉百里同一眇月出梅堰高水落松陵淺曲渚  
屢縈紆環洲逶迤轉澹澹波生煙遙遙雲沒峴楓林霜  
欲丹蒹葭露初泫境會心自恬神曠理逾顯同懷寄秋  
水離念得所遣

述感

旭日不照地慘黯東南隅陰風西北來遂與浮雲俱昏  
曉不復辨晦冥忽須臾雷霆擊高空雨雹集堦除皇澤  
亮已竭天威寧所須戾霄無逸飛逝淵寡潛魚貂璫搆

禍患豺虎當路衢宇宙雖云邈吾駕將安如

武夷吟為叔平姪賦

浙水猶未渡閩山安可越夜夢武夷君幔亭弄秋月顧  
余莞爾笑相攜叩丹闕薜荔飄衣裾芙蓉墮冠髮吹愁  
落空際步虛任超忽陡覺聞天雞明星高兀兀九曲杳  
然失對汝清興發安能涉世網生死遞淪沒何當乘飛  
霞揮手謝仙骨

舟過松陵沈子勺邀同顧別駕王半刺諸公宴集  
作兼呈長公伯英

扁舟遡廣澤蒹葭浩蒼蒼笑容被江堤間以秋蘭芳恍  
如覲容儀曄曄舒其光美人忽見招黍竊登斯堂余遊  
伯仲間常恐不得當匪云託肺腑所恃道誼長市交若  
春華改葉隨秋霜苟能抱微衷乖離亦何傷所以一水  
間落穆如相忘豈謂山澤臞無意偕巖廊跡遠心不遐  
斯意兩不妨樂哉此良會周親情所康肴來俱異味酒  
至無返觴新聲奏逸響妙伎呈中央主人詞壇雄樂府  
兼擅場曲誤必屢顧按節知宮商此中有妙理奚必非  
文章世多混真贋誰別否與臧吾將託優孟抵掌以徜徉

雜詩 二首

所居雖廛市其後即我園三周水繞之水流何潺湲灌  
木旣羅戶密篠亦當軒境近心獨遠悠然忘世喧夜枕

鳴谿漁曉窗聞鳥言病不廢杯酒時時亦開尊適意不  
在醉聊託餘生存

人生歡日少戚戚恒多悲每憂此身沒身後無所遺所  
以百年中役役無已時生時不行樂死復安所知墳墓  
且不保智愚豈所期及此有盡軀壺觴聊自持秋雨日  
以深秋艸日以滋嚴霜倏將至不樂欲何爲

長水雨中送董君謨還四明

谿雲壓林林氣黑長河黯淡無顏色大舩驅來笠澤風  
一片歸帆雨中濕送君此去歸舊山東湖之水流潺湲  
四明崇峰二百八一一峰尖如黛鬢董生瀟灑磊落之  
才亦如此對之可以開神顏我歌四明送君酒何惜相  
逢暫攜手便應喚汝董糟丘酒池之中可拍浮盡掃爾  
我坎坷抑塞之窮愁丈夫意氣自有主爲蛇爲龍何足  
數無錢但須典鷓鴣有酒便能賦鸚鵡少年得意多挪  
揄却笑乃公爾何苦仰天大叫白日徂腐鼠那可驚鴉  
雛男兒世間何事不可作但不能以此七尺爲侏儒功  
名富貴可以赤手博摧眉俛首胡爲乎世人聞之皆掩  
耳董生之前可語此酒闌歌罷君發船我亦還家渡長  
水

歷陽

聖祖開基日淮南即舊邦六龍飛采石萬馬渡橫江豪  
傑爭挑戰轅門已受降雲山凝望處彷彿見旌旂

項王廟

落日陰陵道悲風百戰原當年意氣盡四面楚歌喧  
子弟軍誰在春秋廟獨存江亭艤船處悽惻不堪論

橫江

日落海雲起蒼茫倚棹看橫江不可渡秋水正漫漫  
夾岸青山出孤飛白鷺寒當歌有明月對酒莫辭乾

江行與蘇生別

葭莢正蒼蒼綠流水一方平沙連極浦斜日上危檣  
坐惜故人別因悲江路長行行秣陵近回首各他鄉

人日峴山遣興

人日人爲客春風春可憐煙波浮宅遠丘壑寄情偏  
柏

葉烏程酒椒盤下若鱗如從習池飲醉臥峴山前

正月十六夜畢孟侯至

春艸忽已綠春潮寒到門喜從新雨後得共故人言  
小婦調中饋殘燈續上元庭梅未搖落還擬數開尊

送沈嘉則之天台訪道士

秋水看疑合秋聲聽不分此時四明客去謁三茅君  
洞壑深藏日峰巒盡入雲蒼茫煙樹裏笙篴幾回聞

廣陵送張孟奇

乾坤同作客千里任飄蓬况復離亭別蕭條落照中  
濤聲揚子北寒色海門東去去煙波外無爲歎路窮

送萬和甫歸里

亦知非遠別還復念孤征行色江天樹歸帆水國程北  
風吹斷鴈九月豫章城到日深愁汝淒其倦客情

聞王師東援朝鮮

材官十萬欲平倭司馬何如漢伏波殺氣曉連玄兔郡  
將軍夜渡白狼河還須直破伊岐島莫使虛傳杖杜歌  
禮樂東藩箕子國王師急爲洗干戈

金山紀事

西來邊警日倉皇東望烽煙漲海黃持節不煩蘇屬國  
和戎誤聽漢中行遂令綸綍虛丹鳳翻引旌旗指玉狼  
莫道朝鮮猶未靖急將戈甲禦遼陽

送康元龍還閩時歸自海上

書生尊俎笑談兵幕府還聞倒屣迎九塞昔曾驅馬度  
五湖今許放舟行海天雲樹無諸國客館鶯花樵李城  
莫道倦遊歸計拙春風應念倚門情

重送萬和甫還江西

去歲今年兩度回寸心遙指白雲隈城頭擊鼓天未曙  
江口候潮船正開望望美人南國遠淒淒孤雁朔風哀  
明朝此地看山色愁絕還登百尺臺

春懷

衡門過雨淨疎簾愁對春江淚共添萬戶耰鋤連海岱  
三苗戈甲遍巴黔和戎自詫長城險御馬誰知朽索纖  
杞國憂懷殊不細起看林月步虛檐

舟中眺雪

俯仰迷江甸東南凍未蘇扁舟下遠水積雪斷寒蕪朔  
氣連滄海窮陰混太湖瀟瀟兼霰密脉脉受風扶大地  
遙浮越低空近壓吳山川紛莽蒼雲木半虛無鴈路纔  
分影鷗沙祇辨呼戢鱗潛素鯉側目逗饑烏色借齊宮  
並音操郢曲孤披來朝練淨映處夜珠枯不用裁梁賦  
偏宜入剡圖乍驚容鬢似却怪歲華徂臘漸回杓斗春  
先到酒壚乾坤原浩蕩泥滓蹙崎嶇自笑寒暄態誰燃  
造化鑪聖朝陽德在白日麗高衢

浪口渡

柳風吹浪花谿雲澹無色偶此爭渡人日夕未遑息

煙霞洞

古洞鴉路深杳渺不知處忽見煙雲來疑從此中去

館娃宮

不嗟亡國餘而憐奇豔絕翻得捧心人吳宮名未滅  
十八夜宿煙雨樓初見月

雨氣連朝夕湖雲濕未收今宵看月色始覺過中秋

姚舜牧一首

舜牧字虞佐烏程人萬曆癸酉舉人廣昌知縣  
有承菴詩集

詩話承菴以厚德聞鄉里事難悉書研  
究六經各有疑問詩不專工然頗自喜

自君之出矣



自君之出矣妾守深閨裏花落委泥中誓不隨流水

林章 十七首

章先名春元字初文福清人萬曆癸酉舉於鄉

有林孝廉集

謝在杭云孝廉桀驁不羈才情楚楚信自可人曹能始云初文才士不欲以庸孝廉是處好為人

排難解紛乃以無心獲罪謝司寇出之縲絏之中適遼海有警累上書進奇策願身列戎行鍊甲兵備緩急為嫉者所繩觸憲而死詩如客情如春艸無處不堪生無家逢寺好多病見僧親曉煙常帶雨夜月忽啼禽千山風雨裏一任子規啼皆絕酸楚錢受之云閩中詩派宗子羽而禍繼之以撫倣蹈襲為能事初文才情跌宕於唐人格律時欲跳而去之要能不為閩派所羈繼可謂傑出者也世宗末倭寇犯閩初文年十三上書督府求自試行間既舉于鄉累上不第走塞上從戚大將軍游座上作灤陽宴別序酒未三巡詩序並就將軍持千金為壽緣手散去挈家寓金陵憤南曹曲法斷獄奮臂直之坐繫獄三年始出關白之亂兩上書請用奇兵上海上勦賊報聞而已繼又抗疏請止曠稅兼陳立兵行盪之策帝感動下內閣票擬舉行四明相承中人指閣其事密揭請逮治望闕長歎憤懣撫膺即日下獄暴病而死天下惜之周元亮云初文才情悽婉

少年行

君不見長安俠少年酒底高歌花底眠鬪雞走馬千金散何曾盜箇官家錢一朝忽報邊烽起從軍不待別妻子但言割地與和親不愁戰死愁羞死

春日送別

春風自多思奈與客情違楊柳頻催別蘼蕪不送歸千山獨上馬一曲兩沾衣回首河橋道迢迢看落暉

吐漿臺弔淮南王英公

孤祠千載後不是漢人開劉項俱天意韓彭只將才九江殘水過六國故山迴惟有啼鴉在黃昏下此臺

舟中別張仲豫

昨日淮陽客今朝江上還離亭一杯酒去掉萬重山雲  
樹故人意風塵游子顏未知攜手處莫惜暫追扳

暮春登燕子磯懷古

楊子江南燕子磯楊花燕子一時飛六朝人物空流水  
兩晉山川盡落暉艸色遠迷瓜步去潮聲暗打石頭歸  
倚闌天際春三月惆悵東風動客衣

陳漢陽同年招飲晴川閣應城田功甫孝廉適攜

酒至余於功甫為初識而別漢陽則十年矣時當  
七夕書以記之

木葉西風漢渚波高樓徙倚晚涼多十年易作人間別  
七夕難為客裏過陳子榻前堪對酒田郎座上好彈歌

孤城漏下雙星見牛女娟娟正渡河

鄖城見黃序賓使君

雲雨交情此日偏與君相見可潛然豈無太守二千石  
那有故人三十年冠為王陽彈不黍袍因范叔脫堪憐  
舊時一片灤城月何似今宵漢水前

潛山送友還闕

艸艸相逢楚澤西紅亭綠酒又分攜人生底事憐雞肋  
客路長教怨馬蹄舒子州前檉葉暗越王城外荔枝齊  
十年歸夢如流水一夜隨君下建溪

送別

相送到江干淒其風又雨淚下沾君衣看君不能語

夜度恨這關

楚水東邊別路多  
秋風夜半動離歌  
迢迢恨這關前月  
獨照行人過汴河

河水 二首

河水灣灣遶大堤  
堤邊楊柳一時齊  
可憐折盡青青色  
長送行人出水西

河水漫漫日夕流  
流將清恨到青州  
不知郎在青州不  
妾在河西西盡頭

豔曲

百花臺上百花開  
妬柳驕桃一處栽  
惟有東風情最好  
桃邊吹過柳邊來

憶仲姬

逢時把酒對紅顏  
親為拈花插翠鬟  
今日登高人萬里  
教伊獨上望夫山

春日

春城柳色入東華  
莫惜驂騑過酒家  
記得去年江上別  
風吹二十四橋花

渡江

不趁東風不待潮  
渡江十里九停橈  
不知今夜秦淮水  
送到揚州第幾橋

元旦

千官春珮擁朝班  
萬國歡聲動聖顏  
獨有縲臣無祝處

隔牆遙拜孝陵山

孫繼皋

六首

繼皋字以德無錫人萬曆甲戌賜進士第一歷  
官吏部左侍郎有柏潭集

山中

山中無棟宇小屋但誅茅境僻人煙少  
林深虎迹交暗泉通石竇炎日避松梢  
寂寞元吾事披襟誦解嘲

立秋日病

伏枕仍今夕開軒乍已秋高梧片葉落  
大火一星流楚戶砧初動齊紈扇欲收  
因思故園鱸強起賦登樓

慧

十月慧星見一旬光丈餘銀河不用掃  
天意欲何如避殿君王詔登臺太史書  
杞人憂國淚占夜幾踟躕

送周計部餉邊

大漠平連薊北天向來前箸急籌邊  
將軍已佩通侯印使者仍輸太府錢  
幾處鼓鼙閒落日何年烽火避甘泉  
君行會有匡時略試問金城塞下田

丙子春夢得一聯足成一絕

落日船頭浪春風江上山家園幾千里  
却向夢中還

芙蓉湖

芙蓉湖邊楊柳斜家家啼鳥村村花  
水面歌兒搖画舫陌頭游女渡香車

明言終卷五十一  
余孟麟一首

孟麟字伯祥江寧人萬曆甲戌賜進士第二歷官南京國子監祭酒有幼峰學士集

多病

多病門常掩深秋葉盡飛自憐初學廢遂覺故人稀  
鑷白心虛壯還丹計實非不堪風露色猶著芰荷衣

孫鑛二首

鑛字文融餘姚人萬曆甲戌進士歷官太子太保南京兵部尚書有居業編

詩話月峰勤學過於上安慧業不如靈運觀其論詩有云韓退之於詩本無所解宋人目為大家直是勢利他爾是何言與尸佼所云松柏之鼠不知堂密之有美從者也

雨

漠漠雲籠閣霏霏雨拂簷彈琴絃半緩收扇墨多黏  
古礎方花潤高枝墜果甜此心無俗慮屋漏亦何嫌

舟行

天陰村逕黑渾迷舊時路忽逢岸上燈照見橋邊樹

趙南星八首

南星字拱極高邑人萬曆甲戌進士除汝寧推官入為戶部主事改吏部歷負外郎中謫平定州判官起太嘗寺卿尋陞工部侍郎拜都察院左都御史進吏部尚書謫戍代州卒謚忠毅有

趙忠毅公集

姚孟長云夢白詩淋漓沉痛讀之如聞易水擊筑之音

雜詩

騎馬出城門攬轡登高岡秋風凋百草原野何荒涼離  
獸縱橫馳飢鳥鳴且翔四望多古墳蕭蕭蔭白楊結根  
連枯骨落葉滿墓傍泉室永寂寞無復白日光今古更  
相悲奄忽若朝霜觸骸樂南面無乃非其常修名苦不  
立死亦何足傷

宿雨

宿雨苦不開四望垂雲黑塗潦浩縱橫阡陌不可識客  
子駕言邁行行還自惻薄暮路轉修人馬同倦極高空  
絕飛鳥况我無羽翼遠壑來悲風草木慘無色念彼白  
駒詩喟焉長歎息

聞陳荆山方伯病免

解組亦常言斯人何其果纔見北來鴻俄聞南下舸故  
人俱還山酒錢誰寄我嗟彼四海人何限不舉火拯物  
豈不懷仕路方坎珂同心眇天末難鼓山陰柁酌我犀

角杯遙思澆磊砢

余曾寄荆山犀杯

壬子仲春與梁升吉徐新周汪景從吳昌期及其  
子貞復遊沛上取水烹茶

命侶遊南郊乃至沛之干春風澹未放薄衣尚微寒水  
落出平沙中爲新月灣抽蒲此偶坐西睇太行山淺流  
開明鏡綺波生其間童子負茶鼎烹之瑩心顏自有沛  
水來勝事良絕難俗人旣無韻雅人未必聞我輩幸免

俗世務不相關濁河衆魚噉夙志非投竿

庚戌立夏日

旱氣翻涼冷司方改祝融家家田望雨日日土兼風轉  
壑非能盜開倉未濟窮已知天意久不肯遽年豐

燕子

漸見年來燕子稀香泥何處戀忘歸竹亭艸閣簾虛卷  
樹杪雲邊影乍飛社口屢看時節爽舊巢恐與主人違  
蕭條景物殊疇昔歎息林中事亦非

寄艾卿

懸瓠城頭坐日斜日隨鴻雁極天涯祁連風卷沙如霧  
瀚海春飛雪作花擊筑可憐燕市月鑿空虛擬漢臣槎

已擽萬死投荒塞豈望金雞更憶家

寄象先兵部

長安歲晚雪霜頻林下應知忘故人此日音書那不寄  
銀魚冬筍未嘗新

李三才 六首

三才字道夫臨潼人萬曆甲戌進士除戶部主  
事歷負外郎中謫東昌推官陞南禮部主事轉  
郎中出為山東按察僉事歷河南叅議副使調  
山西入為大理少卿擢右僉都御史督漕運拜  
戶部尚書有雙鶴軒鷓鴣軒二集

秋夜宿直

十載猶郎署蹉跎媿少年涼風迴樹杪白露下庭前漏  
度三更雨燈殘五夜煙由來飛動意回首欲茫然

送許郎中轉餉薊密諸鎮

重鎮經行遠清秋離別難和戎兼漢策轉餉命秦官朔  
鴈驚風下邊雲入夜寒都亭尊酒罷落葉滿征鞍

送姜仲文之徐州

轉餉君之楚爲郎我滯燕一尊悲遠道並馬憶朝天雲  
失西山樹江迷大澤煙相思若汴水日夜咽君前

送馬心易被謫南還

風雨金陵暮蕭然逐客舟酬恩空一劔去國正三秋岸  
闊青楓遠江深落照愁五湖知有興只此又何求

和李茂才春日見寄

滿路生芳艸歸心羨馬蹄何當明主棄遂作故園栖梅  
柳愁爭發山河望轉迷忍貪朱紱貴一任白頭低

送諸博士壽賢量移過里兼懷顧叔時兄弟時方

有洮岷之警

秦關西望壯心驚風雪梁園送汝行漢帝有恩前賈席  
書生何計請終纓金縢歲月翻挑釁宵旰朝廷已論兵  
若到江南逢二顧安危萬里想同情

李化龍

五首

化龍字于田長垣人萬曆甲戌進士除嵩縣知  
縣陞南京工部主事歷郎中改吏部出爲河南



提學僉事轉參議遷山東提學副使轉河南參政入為太僕少卿陞右通政以右僉都御史督川湖雲貴以工部右侍郎督河道入為兵部尚書加少保晉少傅兼太子太保卒贈太師謚襄毅有李襄毅公詩文彙

詩話于田詩雖沿王李餘波然頗爽豁胡元瑞所稱譏其醜厚肥膈而棄之不錄未免矯枉也

以其為

### 古行路難

君不見鳳凰臺前人已去後人來又不見長干里昔時樓榭今荆杞白雲蒼狗只須臾世間反覆何所無衛青未遇平陽奴衛青既貴平陽夫萬事無如眼前好守株待兔何為乎

### 秋日飲張司理

關河秋色晚蒼蒼江畔逢君更憶鄉海內弟兄多意氣天涯雲物總淒涼三山木落啼猿急八月風高旅雁長此夕燈前拚盡醉故人明日權相將

### 登醫無閭山

天柱高標九域東振衣萬里受雄風雲煙低擁黃龍府日月高懸黑帝宮截海帆檣來徼外防秋士馬下回中分明半壁歸撐拄合有明禋禮上公

### 題清苑涇陽驛壁

二首

短墻小屋柳垂垂二十年前此咏詩今日重來無覓處空餘烏鵲繞寒枝

南去北來枉自嗟閒愁贏得鬢生華數行遺墨猶難保  
何況玄都觀裏花

謝杰 二首

杰字漢甫長樂人萬曆甲戌進士除行人歷官  
戶部尚書有北窗吟藁

煌煌京洛行

煌煌京洛維帝之鄉地交陸海人雜五方物態千狀靡  
可籌量炙手可熱死灰或颺清商回換六月飛霜翟公  
門第雀羅倏張衛青僂僕夕拜侯王黃金作埒白玉為  
堂東鄰施戟北里鳴璫鄆杜惡少邯鄲名倡徵歌百萬  
縱博千場時不可再樂不可常悠悠南陌纍纍北邙東

望上蔡西望咸陽黃犬既斃狡兔亦僵有德以昌無德  
以亡周公之訓儆如探湯

死馬行

月月橋門進草束千束萬束猶不足朝朝死馬出橋門  
五匹十匹紛相屬馬草日進馬日飢馬飢日死人日肥  
圉人圉人馬用爾輩為草人上草將錢買屠夫領馬作  
肉賣賣馬肉輸圉人馬死何能值幾緡有時州人轉向  
圉人買得死馬州明朝又進橋門道

呂坤 三首

坤字叔簡寧陵人萬曆甲戌進士知襄垣大同  
二縣為吏部主事歷負外郎中出叅政山東按

明言紀卷五十二  
六  
察山西轉陝西右布政以右僉都御史巡撫山  
東陞刑部侍郎有去偽齋集

雜詩 二首

野水漸我車掀之出于淖夫豈避危途行險終違道萬  
事有當然禍福安足保君子守其轍無論遲與早孔孟  
恒固窮儀秦毋乃躁所得非所欲寧以落鬼老  
土偶象為人終復化為土物化還吾初此身了無苦白  
予落蓐時覺饑寒痛楚不幸漸有知六氣滋外侮逆境  
不須論快事奚予補勞勞空百年孰注南宮簿

別意

留妾一身在憐君萬里行夜來雙泪盡不忍到長亭

徐元春 一首

元春字正夫松江華亭人萬曆甲戌進士歷官  
太僕寺卿

靈谷寺訪月泉禪師

山郭尋僧出行行黃葉邊石泉秋聽急江月坐來圓興  
豁長昏夜門開不住天時聞鐘磬發獨立萬峰前

楊四知 一首

四知字元述祥符人萬曆甲戌進士除行人擢  
陝西道御史歷大理寺少卿

高玄殿

高玄宮殿五雲橫先帝祈靈禮太清鳳輦不來鐘鼓靜

月明童子自吹笙

邢侗四首

侗字子愿臨邑人萬曆甲戌進士除南宮知縣  
徵授監察御史出為湖廣叅議陞陝西行太僕

少卿有來禽館集

史紹卿云先生能文能詩能  
書能画叢會諸長擅絕兼品

詩話子愿雖有詩名為書法所掩其言曰詩盛于嘉隆七子以為盡詞  
人之變矣然效趨者高趾促柱者急張往往不病而呻吟匪樂而強笑  
江河日下七子之盛七子之衰也蓋深  
中時流之弊特其自撰不見脫穎耳

竹馬歌為濟南太守樵李沈公作

使君五馬馬五色兒童竹馬馬以百朝朝遲公阡與陌  
胡為不夙來令我父兄頭漸白

起居宗伯尊師于公

七上書移疾三經月改弦臣心霜露切帝命起居駢去  
住違今日遲回易長年獨餘秋夕夢常繞汶陽田

走筆戲贈萬伯修使君

五花番馬鸚鵡裘夜獵歸來興未休教唱西涼新樂府  
一時霜月遍幽州

古意再寄于田

零落鈿蟬出漢宮闌干雙淚背春風君王總署迴心院  
再画蛾眉恐未工

周弘禴一首

弘禴字元孚麻城人萬曆甲戌進士除戶部主  
事謫無為州同知陞順天通判復謫代州判官

日言錄卷五十一  
遷處州府推官轉南兵部主事歷尚寶司丞進  
少卿三黜爲澄海典史有澄海集

乙酉貶代州壬辰貶澄海俱旅宿高碑店

風塵何處問啣盃南海浮槎更可哀古道垂楊應笑客  
逐臣何事又重來

游

朴

三首

朴字太初福寧州人萬曆甲戌進士除成都推  
官入爲大理評事官至湖廣右布政使有藏山

集

行役

驅馬上高山山高欲近天及到山巔上更有山在前高

山豈有盡客行良可憐

木綿菴

淒淒木綿菴賈相此裂腹矯矯鄭虎臣手代天行戮戮  
死頗快人所恨死不速元兇僅就誅宋社亦已屋蒼生  
尚含憤未得食其肉一夫恣胸臆九有被荼毒生竊片  
時歡死作千世辱寄語當路兒此是前車覆

崇寧縣却酒

崇寧清酒如鬱金主人長跪留客斟客行欲飲迫程限  
不飲傷此主人心春花爛漫遍山壑把酒澆花殊不惡  
客還有酒應留連只恐山花已零落

范

涑

一首

日言卷五十三  
涑字原易休寧人萬曆甲戌進士除南城知縣  
入為刑部主事歷官左布政使有水堂吟

浣花溪

百花潭接浣花溪饒笑堂開傍水西  
新綻天桃帶微雨輕飛柳絮半沾泥  
尋芳力倦年非壯懷古愁多日欲低  
回首白雲家萬里深林偏喜杜鵑啼

鄒迪光 六首

迪光字彥吉無錫人萬曆甲戌進士除工部主  
事歷負外郎中出知黃州府陞福建提學副使  
左遷浙江僉事調湖廣提學僉事有鬱儀樓調  
象菴始青閣諸集

詩話彥吉詩材庸熟望而生憎絕句差清婉可誦

行經舊院

曲房深院艸萋萋不見嬌鶯滿樹啼  
惟有秦淮舊時月夜深相送板橋西

沈淵淵置妾金陵為作花燭詩

蘭缸四照月痕新繡帳牙床疊錦裯  
不羨鄰家金作屋請看夫壻玉為人

賦得西湖柳

一種腰肢浥露妍湖光占得倍堪憐  
縱然春盡須飄泊只在瑤箏錦瑟邊

西湖竹枝詞

杏子單衫窄地長裙拖八幅石榴香只知此日遨遊好  
不信蠶家四月忙

澄江舟行

夕陽秋色布帆懸霜葉霜花送客船雨過鳥啼多竹外  
月明人語在沙邊

逐臣

枕榔木落嶺猿啼瘴海蠻煙路欲迷回首銅駝三萬里  
不知何日下金雞

朱期至

一首

期至字子得蘄水人萬曆甲戌進士除戶部主  
事歷負外郎中終懷慶知府有王屋山人集

送蔣太守之瓊州

五羊南去客星孤銅柱遙分使者符爲語越裳諸屬國  
清時不用貢珊瑚

沈璟

二首

璟字伯英吳江人萬曆甲戌進士除兵部主事  
改禮部轉負外復改吏部降行人司正陞光祿  
寺丞

擬古答澤民

客從遠方來遺我一紈扇上有秋風詞讀之淚如霰颯  
颯懷袖間悠悠異鄉縣會面詎有期涼燠代更變莫以  
新相知棄捐故與賤

酬澤民見懷之作

何來雙鯉漢江頭江水西南萬里流高枕青山家負郭  
開襟白日賦登樓洞庭葉下孤雲晚夢澤寒深五月秋  
珍重芳蘭堪作珮湘皋搖落不須求

陶允宜 六首

允宜字懋中會稽人萬曆甲戌進士除刑部主  
事官止黃州府同知有鏡心堂集

蘄箬

箬出蘄州世所無五月六月繩牀鋪恍坐水閣眠冰壺  
皇都炎熱逾江湖貴臣催箬如催租民情誰語州大夫

蘄艾

七年之病三年艾起死回生人所賴芄芄白葉功爲最  
麒麟山上王城在索取其中却其外出入頗煩闍者怪  
何時斷種出野菜火病箬痕兩無害

蘄蛇

花蛇方頂尾甲指捕者剖腹投之水自脫腹胃淨如洗  
大如竹箭長尺咫能却風孿化食痞方其出穴疾如駛  
偶遭毒吻人立死我節食飲慎眠起諸邪不侵病良已

蘄龜

千年龜小象圍棋其甲翠綠毛毯摠置之盆水生漣漪  
蚊蠅遠避塵自離壁頭牀足兒曹嬉不飲不食長如斯  
求之艱難誰得之



麻城鵝

麻城鵝品光州右餌以膏梁兼築豆肉色紅鮮滋味厚  
取之為鮓進元后近年黃州失耕耨一鵝之肥幾人瘦  
黃陂葛

楚人種葛不種麻男採女績爭紛拏黃陂所織尤精嘉  
光潔勻細眼不斜皎如白苧輕如紗進之內宮傳相誇  
雲綃霧縠無光華價值減少尺幅加織者十家逃九家

支大綸一首

大綸字心易嘉善人萬曆甲戌進士由南昌府  
學教授陞泉州府推官謫江西北布政司理問遷  
知奉新縣有華萃集

信州公署

玉露楓林旅雁寒綠蕉分影入雕闌自憐兩度來江右  
不是閒官即冷官

韓子祁一首

子祁字心堯平湖人萬曆丙子順天鄉試中式  
除德安推官補贛州歷蘇州府同知有醢雞集

煙雨樓

層樓百尺點空濛東指蓬壺一葦通春雨自添湖上碧  
晚霞輕抹浪頭紅萬家煙火浮天外午夜星辰落鏡中  
醉坐漁磯還獨酌却將鴛渚作鰲宮

龐一德一首

一德字與虔南海人知府嵩子萬曆丙子舉人  
嘉魚知縣教授揚州有雙瀑堂橐

山家

入山亦已深居人一何稀百里三四家茅茨枕山陂爨  
斫山木葉餉食道邊藜斜日羣行汲漏下未得歸籬門  
麕眼疎所憂虎與羆居人已偃臥何由知客悲

明詩綜卷五十二

明詩綜卷五十三

小長蘆 朱彝尊 錄

休陽 汪文楨 緝評

沈懋學 三首

懋學字君典宣城人萬曆丁丑賜進士第一授

翰林修撰追謚文節有郊居遺橐

王元美云先生詩  
文不名一家縱橫

押闔往往  
出人意表

靜志居詩話君典少任俠兼精技勇能上馬舞丈八稍嘗出塞縱觀飛  
狐花馬險塞突為曠騎追至幕南君典挾一矢命中其黨乃不敢追既  
登狀頭是年第二人即江陵相君子嗣修江陵方欲引以相助會奪情  
之舉君典貽書嗣修謂相君天子師表奈何棄綱常飽人以口實嗣修  
恧不能荅也又貽書李尚書養河辭頗激切養河發書嘻笑而已君典  
迺與吳編修子道趙檢討汝師謀各上疏吳趙受杖去官而君典疏草  
為人所持不果進然江陵業恨其異已而海內皆服其風節矣君典四  
十而夭年壽不將命爾而王元美作墓表屠緯真作傳欲傳會曇陽子

昇真之確至以妖夢厚誣光明磊  
落之君典是豈愛人以德者邪

次別曾直卿太史

年來多病檢方書夢入雙溪把釣餘  
賈誼豈能收涕淚嵇康元自愧麤疎  
翻愁草色春將晚却笑桃花錦不如  
戀別可堪風雨夕江天搔首坐躊躇

署中聞子規

一片愁心託杜鵑望中隴樹斷蒼烟  
歸人只是歸難得白髮相催又隔年

贈沈孟嘉訪開之湖上

初陽臺上紫雲停何處璫簫入夜聽  
載酒看花歌白苧直教明月下西泠

曾朝節一首

朝節字直卿臨武人萬曆丁丑賜進士第三授  
編修歷侍講諭德進侍讀學士少詹事升南禮  
部右侍郎掌翰林院終禮部尚書謚文恪有紫  
園草

方正學祠

祠堂開木末宛在闕庭前縑經舊君服離騷絕命篇已  
知心匪石肯汙筆如椽瓜蔓抄雖毒遺文百世傳

馮琦七首

琦字用韞臨朐人萬曆丁丑進士改庶吉士授  
編修歷侍講右諭德左庶子少詹事升吏部侍

郎卒贈禮部尚書謚文敏有北海集

陳卧子云宗伯經術之士其詩

雖未冥搜亦能象合

結交行呈楊公亮時公亮止酒

寒不作堂上燕饑不作鞞上鷹鞞上威稜豈不峻一飽  
即掣非人情親極難為疎貴極難為賤長平未罷賓客  
去何必貴賤交情見君不見步兵廚君不見濬冲壚長  
安車馬夾道趨雲雨翻覆無時無君今不醉胡為乎

送伯楨侍御之川中憲副

間何闊逢諸葛行且止避御史御史今年三十幾廡繡  
翩翩帶金紫聖主真憂萬里外使君建節三巴裏刑天  
舞干亦自豪精衛填海空復勞黃河懸水三十仞呼風  
亂度難容舠嗟嗟王郎汝何往古來得失如反掌長安  
大路多摧輪况乃蜀道青冥上蜀道之難難於天不如  
歸問棗麻田振衣獨上三峰顛塵埃野馬何茫然君不  
見鴈門菟郡伊與鹿南陽畫諾亦見逐世間萬事誰能  
卜汝為遠臣恩已足

邢太保破倭功成以大司馬筦留鑰過家省覲太夫人

雲霄漢闕頌新命豐鎬周京奠舊邦九列獨高蒼玉佩  
六師爭擁碧油幢橫戈絕域春浮海擊楫中流夜渡江  
聖主憂先根本計留侯籌策况無雙

恭陪聖駕步禱南郊紀盛

龍武新軍罷勾陳御路開紅塵都不埽留待雨師來

題萬玉山房

本是瀟湘人最愛瀟湘竹何處丘中琴歷歷瀟湘曲

題闕氏画像

紅妝一隊陰山下亂點酡酥醉朔野塞外爭傳孃子軍  
邊頭不牧烏孫馬

送魏懋忠

擊筑高歌興未孤暫分離恨作歡娛不知後夜相思夢  
得及今朝醉裏無

余繼登 三首

繼登字世用號雲衢交河人萬曆丁丑進士改

庶吉士授簡討累官禮部尚書贈太子少保謚

文恪有澹然軒集

詩話文恪古詩指陳時事鏗奇磊落卓然名家其在容臺值國儲未建  
災變頻仍雷擊太廟樹南都火太白經天秦晉齊皆地震西寧鐘不扣  
自鳴紹興地出血公俱直言無諱先公冊封周藩公詩惟以早燬為憂  
不失古人贈言之義聞公先是使周藩渡河舟膠柁折公告于神曰使  
臣縱有罪神敢震驚龍節亦有佚罰維神實圖  
利之禱畢而波恬若有翼舟以濟者斯亦異矣

送朱太史養淳冊封周藩

昔予祇行役驅車向中原中原饑饉餘氛侵日以煩白  
骨亂如麻黯然銷神魂朱門鬱蕭條哀哀諸王孫君今  
復持節翩翩過夷門不知周子遺今有幾家存况今旱  
為虐五月黃塵昏知君負經濟雅志念黎元當其授簡  
時應為廢朝餐莫以董賈筆虛負鄒枚言願賡雲漢篇

歸來達至尊

送張伯任都諫閱邊

開城古雍州漢家朝那地迢迢控諸番可以斷右臂一  
從和議成關門久不閉無復念軍興祇聞增歲幣壯士  
卧干戈邊城罷烽燧豈不息戰爭詎可銷兵器藩籬不  
復施豺狼日窺伺去年戎馬來三軍同日斃所過無雞  
豚哀哉肆吞噬天子頻西顧疆吏盡更置君從掖垣中  
叩閤數言事聚米悉邊情一一當上意藉爾青瑣賢出  
作行邊使周覽昔戰場白骨尚委棄四野無人烟那能  
不隕涕誓將廓垢氛何以壯軍勢君其賈餘勇時方待  
高議好上金城略永垂秦川利甘學汲公驚寧顧漢庭

忌得君借前籌庶同指掌易

放歌

余雲衢汝亦堂堂七尺軀二十脫穎薦鄉書三十挾策  
計吏俱玉堂金馬此何地容汝久玷承明廬從汝執經  
已三載天子不肯臨石渠吁嗟乎汝既無封侯骨拜相  
鬚謾言虎可繡龍可屠屠龍繡虎竟何益况汝冥頑一  
技無汝不見轅下駒一旦受君牧與芻為君萬里爭馳  
驅少府金錢等膏血太倉粟米煩徵輸念汝何功敢竊  
食十二年費官家儲去夏一病幾長徂汝今不去將安  
需衛河之澣茅可誅且營菟裘為汝居貴何須誇趙孟  
富何須羨陶朱從今且自脫樊笈三家市裏逡巡酒五

畝園中穀棘車免使微名挂朝簿耕田鑿井歌唐虞

鄒元標 二首

元標字爾瞻吉水人萬曆丁丑進士觀政日以  
建言謫戍召授吏科給事中復以言事降南刑  
部照磨升南兵部主事改吏部歷員外郎中罷  
起大理寺卿升刑部右侍郎終都察院左都御  
史贈太子太保吏部尚書諡忠介有存真集

詩話先生晚總西臺入朝而躡御史前糾失儀先文恪公進言曰元標  
在先朝直言受杖至今餘痛未除也德陵意解此事實錄不載附識於  
此

簡羅公廓給諫

老去交情重懷君意轉深廿年青瑣客同賦白頭吟突  
兀千秋意蹉跎萬古心嚶嚶聞好鳥相喚出幽林

送俞定所起大名

久別相看慰所思送君空有淚臨岐黃沙白草無窮恨  
不獨尊前感別離

陸可教 三首

可教字敬承蘭谿人萬曆丁丑進士改庶吉士  
除編修歷官南京禮部右侍郎有學士遺橐

吳宮引

姑蘇臺前烏飛絕西施醉舞吳宮月織桂長袖香不歇  
銀燭金釭半明滅羅帳流蘇四垂結銅壺丁丁漏水咽  
伍胥大夫雙胛裂

春日郊游

出郊時駐馬物色澹春陰偶爾耽幽賞因之愜素心人  
家隔水見僧院入花深似覺仙源近迷津未可尋

陶山幽棲寺

萬山迴合隱招提聞說鷓夷舊此棲三策早知能霸越  
千金何意復居齊人尋古洞穿雲入木落層巖聽鳥啼  
欲向山僧論往事五湖烟櫂至今迷

楊起元 一首

起元字貞復歸善人萬曆丁丑進士改庶吉士  
除編修累官吏部右侍郎兼翰林院侍讀學士  
謚文毅有家藏集

送黃雲崖宿州掌教

前月乘輜車經過睢陽驛慨然思古人入城訪遺跡西  
去二百里張許今廟食秉彛在人心誰不好懿德君今  
涉淮流傳經聚逢掖文藝何足云忠孝為標的國家根  
本地士風最當植丈夫萬世名勉之在一息

嚴一鵬 二首

一鵬字汝化無錫人萬曆丁丑進士除行人以  
貴州道御史按廣西以浙江道御史按浙江以  
福建道御史按山東歷官刑部左侍郎贈尚書  
有二知軒詩藁

詩話尚書達尊居三特賜存問賦詩雖不多調故清徹有長孫福孫最  
善易著易通義頗發先儒所未發惜未刊行其次中允繩孫也尚書藁



流傳者寡從中  
允所抄得之

吏隱齋懷孫龍涵

分袂愁何限開函喜不禁三年羈旅思千里故人心日  
落梁溪暮花殘魯地陰天台如有賦雙鯉莫浮沉

清明日賈弘菴棲隱園社集

春風吹拂柳絲斜佳節相攜感物華共有錦囊題白雪  
未須金管勸流霞人行磴道初如蟻日落湖帆盡載花  
散步踏芳歸任晚城南猶有未棲鴉

馮夢禎 十一首

夢禎字開之秀水人萬曆丁丑進士改庶吉士

除編修終南京國子祭酒有快雪堂集

開之不悅

於時相左官外謫以南國子祭酒歸遂不復出築室孤山之麓家藏快  
雪時晴帖名其堂曰快雪歸田九年而卒為詩文疎朗通脫不以刻鏤  
工求

詩話馮公儒雅風流名高三席歸田之後間娛情聲伎筆歌酒譙望者  
目為神仙中人詩亦不蹈時習五古能盤硬語尤見意匠經營同譜若  
沈君典屠緯  
真皆不及也

結交篇 有序

余少時友周生彥雲嗣交賀生伯闇庚午癸酉  
余與彥雲相繼登鄉薦丁丑余以南宮舉首官  
翰林中遭廢棄壬辰出山赴南司業癸巳擢掌  
南翰其明年甲午伯闇始舉于順天乙未成進  
士官行人而彥雲猶未釋公車功名之遲速變  
幻如此今年丁酉秋余為南祭酒幾二年所而

彦雲自里中見訪時余苦疴方上乞骸之疏會  
有詔使臨則伯聞也我三人廿年中離合不知  
凡幾忽有此晤喜不自勝遂成此篇

憶年十五六眼空心膽麤三人笑相暱意氣凌萬夫轉  
蓬三十年飛沉不同塗賀子初牽紱周生尚公車劣余  
最先達典胄山水都撫疾新乞骸逐疴猶向隅明主有  
餘戀故人不我疎賀子忽持節周生未返廬三人共形  
影嘉會在須臾升沉豈有常離合難可拘努力崇德音  
皓首願無虛

仲春湖上登覽與叔宗同賦

春至嘉卉榮氣和長薄絢遵渚洽淪連升堤媚蔥蒨遠  
近生態殊昏旦物候變高下柳盡舒參差桃始炫鳴禽  
選秀木時女步芳甸朋儔或回睇舟陸諧所便勝情欣  
有託日夕遺深眷

題東山許氏小樓

爲樓枕東山山翠常滿樓非徒自怡悅亦以娛朋儔壁  
月當綺牕白雲漾丹丘我來秋色晚不惜十年留南塘  
如可闢兼得狎海鷗

若下

夙昔眷幽溪于今凌潏潏引艇及朝暎滌洄淹夕漲乍  
進離煩蹶少焉益蕭曠岸仄交濃陰林缺露青嶂瞻岫  
集遙姿睇連延近狀改步款蘭疇陟憩紆迴望地偏俗

駕牢侶勝游蹤暢朱羲不遽頽沉懽將無蕩

五十篇

四首有序

昔人云五十之年忽焉以至悲始衰也今歲丁酉八月廿二日乃余五十懸弧之辰鑒止足之分傷流光之駛有懷家園思投簪笏乃賦斯篇五十忽焉至頽齡始自茲懸弧春秋辰稱觴來故知余本靜者流夙好敦書詩散性在丘樊竊祿慙軒墀鐘鼓享魯郊海鳥終不怡鍾阜洵云美豈若還山茨山茨結林麓其陽面清池清池曲且廣高楊夾路垂層樓貯圖史密室藏姜姬出門即湖山興到惟所之偶逢漁樵侶談謔忘歸期人生行樂耳須富貴何時

富貴反多憂貧賤未足卑靈龜戀泥中雄雞憚爲犧李斯具五刑牽犬一何悲陸機西入洛鶴唳聽無期無才足完身功高跡轉危所以賢達人拂衣恒恐遲拂衣謝塵氛舊侶時相追披素詠新賞開帙渙所疑豈不戀圭組天爵無磷淄豈不戀子孫清白自可貽觀民計已極從道安足嗤申毫著斯文聊以適吾私

餘不溪回舟寄訊章元禮

是日雪

吏部才名舊瓊瑤昔見貽山川間問隔日月鬢毛衰身退仍憂國家貧但賦詩迴舟緣興盡風雪寄相思

珠簾洞

帝遣銀河垂虛簾蕩空深我欲買娉婷問爾乞三斛

無題

琉璃硯匣鎮隨身彩筆揮來字字新他日長門如有恨  
千金詞賦不求人

王士性一首

士性字恒叔臨海人萬曆丁丑進士除知確山  
縣事擢禮科給事中終太僕寺少卿有五岳游

草

惡溪道上聞猿

惡溪不可涉地險亦何心石觸雲根出灘迴蜃窟深繁  
霜沙際白落月渡頭陰豈異巫陽峽清猿兩岸吟

魏允貞一首

允貞字懋忠號見泉南樂人萬曆丁丑進士除

荊州推官選授山西道御史歷官右副都御史

兵部右侍郎巡撫山西

詩話見泉以直節聞相傳其子廣微甫登賢書來省其父見泉閉之解  
中不許就禮部試曰此破犁犢也一得志必隳我家聲矣後果然詩近  
狷疎論者謂  
遜其弟懋權

岳陽樓

洞庭天下水岳陽天下樓誰為天下士飲酒樓上頭

徐桂一首

桂字茂吳長洲人居餘杭萬曆丁丑進士袁州

推官有大滌山人詩集李本寧云茂吳咏物以六朝之才  
情具三唐之格調馬仲良云自

舟州歿而禹航徐茂吳先生代興詩  
靡所弗工而詠物之章可稱名家

詩話徐君詠物詩最繁富正如盈擔魔  
合羅僅供邨市癡兒駮女把翫而已

送義公結廬天台

海上栖禪境披雲訪石橋一鉞依澗壑疎磬落山椒華  
頂經年雪松門半夜潮預愁支遁去誰與共逍遙

張維新 一首

維新字憲周汝州人萬曆丁丑進士除冠縣知  
縣擢兵科給事中歷湖廣按察副使

萬壽節早朝

六位龍飛日千官虎拜年嵩呼聞漢殿華祝戴堯天綵  
仗清霜肅金爐紫霧連不才班侍從踈踏冕旒前

陳泰來 一首

泰來字上交平湖人萬曆丁丑進士除順天府

學教授遷國子監博士升禮部主事歷員外謫

饒平典史泰昌即昨贈光祿少卿有員嶠集

詩話員嶠年十八舉于鄉十九釋褐歸娶賜內府金花燈籠知平湖事  
劉抑亭贈以對聯云秋進士聯春進士大登科後小登科鄉里榮之而  
公以氣節自許居太學忤江陵因三王並封面質太倉于朝房又疏請  
建儲既因計典疏救孫鑰謫饒平典史陞辭就道賦詩有直道不緣三  
黜改孤忠或受九重知卒時年三十有六耳謫歸日夢至一山羣仙咸  
集賦詩云涼風拂拂白雲收宦海年年幾日休翦紙作驢輕撥刺桃花  
洞口笑淹留相與樂甚劣一仙云汝乾凌子也後  
一年當再會于此覺而以乾凌子自號踰年而沒

客中午日

客裏端陽也自娛呼童沽酒汎菖蒲家園咫尺汀蘆外  
艾虎朱絲事事無

顧紹芳 五首

日言然卷五十三  
十一  
紹芳字實甫太倉州人萬曆丁丑進士改庶吉  
士除檢討歷左春坊左贊善兼編修有寶菴集

詩話實甫工於五律不露新穎矜鍊  
以出之頗有近於孟襄陽高蘇門者

同公亮敬承茂仁郊游

共道尋春好兼之出郭幽林塘三月暮休沐幾人游樹  
樹陰初合溪溪澹不流從來耽野趣即此是滄洲

即事

小閣上千霄幽人野望遙澹雲清曉樹疎雨綠春苗天  
闊前朝寺風多隔浦橋心期竟何託鐘磬日蕭蕭

喜陸彥先至

常憶秋風裏離尊共黯然所期寧此地相見忽經年白

眼時人過青山旅夢牽懸知有新語羞屬蒹葭篇

山亭閒居

豈有避人意經秋長閉關蕭然松下戶對此城中山得  
雨深林映隨雲倦鳥還漸諳丘壑理聊復養衰頑

舟行即事

願得三千里飛帆一夜還生憎衛河水十步九成灣

沈自邠五首

自邠字茂仁秀水人萬曆丁丑進士改庶吉士

授簡討歷修撰有沈修撰詩集

蔣馭閣云先生詩風格  
端麗意調諧適合乎風

雅之  
正

送徐洪陽侍講使荆

送別青門外雙旌去路賒  
楚天高擁傳江瀨  
隱浮槎赤社開王胙  
金莖憶帝家  
上林新賦就  
雲夢未應誇

白下留別賀伯開

高閣經旬別孤帆  
此日開風塵  
催作客花鳥負銜杯  
細雨白門樹  
浮雲江上臺  
相期不相見  
愁思轉難裁

送高蓋卿少叅

驛騎花前發東風  
二月過漢家  
新節鉞秦地舊山河  
津樹關門合春雲  
渭水多西臺誰領袖  
咫尺望鳴珂

謁關壯繆侯張桓侯祠

赤伏符難再三分志未伸  
江山千古恨祠廟百年新  
事業歸龍戰飛揚憶虎臣  
雄風今尚在灑淚向高旻

馬文莊公輓歌

美謚殊恩錫東園  
祕器分濟時功尚在  
接武事仍聞丹旄飛燕雪  
清笳斷隴雲西州徒有恨  
曲罷淚紛紛

朱維京一首

維京字可大萬安人萬曆丁丑進士歷官光祿寺丞有光祿集

度飛虹橋

鯨海遙涵一水長  
清波深處石爲梁  
平鋪碧甃連馳道  
到瀉銀河入苑牆  
晴綠乍添垂柳色  
春流時泛落花香  
微茫迴隔蓬萊島  
不放飛塵入建章

沈九疇二首

九疇字箕仲鄞縣人萬曆丁丑進士除刑部主  
事稍遷至郎中以按察副使提學江西歷官江  
西左布政使有曲轅居詩集

詩話箕仲以詩名重鄉里人有持所作謁文恭者輒笑曰家弟安知文  
奚不就我族父嘉則以豐對樓詩屬余君房論定君房報書云吾於詩  
僅窺其籓未入其室此事終當屬君家箕仲於是嘉則詩經其刪敘及  
掌江西左轄有中使來司權先檄諸長吏迎勅箕仲宣言曰勅諭中使  
非敕守土吏也例不當迎中使為氣沮一日中使移書自稱予箕仲叱  
其使曰往惟高皇帝起吳時曾稱予若中貴人何敢爾中使大懼立造  
謝其直節自遂亦  
文恭所不如也

### 善哉行

今日樂兮來日可悲天迴地游人莫之知解一彼絃我歌  
會少離多明星可掇肅駕經過解二三十六輻輪輪相復  
但惜馬蹄不惜車軸解三

### 雨中簡吳山人汝震時寄居鐵柱觀

倚柱看黃鳥窺檐拂翠條吾衰春亦去汝病興還饒山  
色樓中雨江聲郭下潮何如平楚外烟柳赤闌橋

### 楊德政 二首

德政字公亮鄞縣人萬曆丁丑進士改庶吉士  
除編修出為福建參議遷副使調廣西陝西提  
學歷山東參政福建按察使有夢鹿軒橐

### 苑田觀穫

南風吹城闕西苑鳴桑鳩帝畝雨露偏田畷職亦修維  
時麥稼登滿地黃雲稠播植良苦艱喜見千倉收皇情  
念民依感之紆殷憂願以庾廩資勤息覃遐陬詠哉七



月篇庶幾追成周

河西阻風戲示同行者

失路依依獨問津  
楊花飄蕩撲征輪  
東風正似郵亭吏  
只解迎人不送人

蘇濬 三首

濬字君禹晉江人萬曆丁丑進士除南京刑部  
主事尋改工部轉禮部員外郎出爲浙江提學  
僉事歷陝西參議廣西副使貴州按察使有三  
餘集

曉發界河

客路逢秋杪中原曙色分  
無情原上草不斷嶺頭雲  
醉

月懷梁苑觀風過汝墳  
楚天看漸遠何處問湘君

卧病

華髮星星短浮雲冉冉流  
客中千里淚夢裏五湖秋  
肺病傷春盡商歌入暮愁  
浮沉君莫問大壑一虛舟

哭王恒甫茂才

何處悲風急淒然獨掩扉  
斷雲空莫莫宿草故依依  
一夢愁如昨千秋事已非  
青山堪共老垂老忽相違

陸懋龍 一首

懋龍字啓原鄞縣人萬曆丁丑進士除合肥知  
縣選授兵科給事中歷刑科都給事出爲湖廣  
參政

小院

小院幽陰似井間風枝墮地點苔斑何時鏝却重檐去  
露出西南一角山

丁此呂一首

此呂字右武新建人萬曆丁丑進士歷官湖廣  
布政司參政有世美堂橐

雨中望勾漏

迢遞策敝車言尋稚川子風雨何淒其蕩然滌塵滓濛  
濛山下雲泠泠峽中水雲水幽以深徑路憑誰指丹竈  
突無烟白石徒齒齒至今不可攀邈焉懷斯理我家西  
山陽許令實同里玄都計非遙赤縣更伊邇沖舉遽難

期沉淪恒自恥孺子儻可言請為公納履

周汝登一首

汝登字繼元嵯縣人萬曆丁丑進士除南京工  
部主事謫兩淮運司判官遷順天府通判轉南  
兵部主事出為雲南參政有海門先生文錄  
恭聞冊立皇太子諸王亦以是日受封志喜

震索從天授年將德共宜尊師開閣早問寢出宮遲太  
后殷勤誨諸王次第隨微臣棲隴畝萬里想威儀

孫成泰一首

成泰字允交平湖人尚書植子萬曆丁丑進士  
除知道州遷蘇州府同知入為刑部員外歷郎

中升饒州知府調邵武再調福建鹽運司同知  
以按察副使整飭大名道

送尤司訓

送君湖上正斜曛楚水吳山咫尺分今日莫辭杯底醉  
數聲風篴片帆雲

吳安國 七首

安國字文仲長洲人萬曆丁丑進士除真陽知  
縣調永康徵授刑部主事歷員外郎中出為寧

波知府升本省副使有葆光軒橐今是堂集

屠緯

真云文仲詩語不必琢惟其骨勝辭不必靡惟其趣長才與情宣意將  
格會 劉玄子云文仲近體有大曆家法 何穉孝云文仲高不亢卑  
不抑導之泉  
注頓之山安

詩話文仲純叔之子南夫之孫詩是家學其自序曰今之為詩者矜一  
字之長競片語之巧張為吾黨侈為此道凌轢同列倚撫前人逞傲誕  
之風長浮華之習蕩閑檢而不顧棄率職其若遺則詩之  
為蠹甚矣蓋嘉隆之間習氣如是稍有學識者如厭之

遊武夷

十年懷名山薄游未能至弭節偶茲辰探奇始欣遂層  
峰抱迴合長林引深邃烟霞鎖冥濛指顧詫靈異玉函  
闕遺封勝跡符往記洄沿九曲溪溪溪落空翠水木澹  
澄暉冷風送餘吹登臨兩稱絕幽期愜遐企願謝區中  
緣浮生永斯寄

秋日偕孫太史萬都諫王比部侯奉常趙大行郊  
游憩禪寺得遠字

嘉辰值休沐晴郊恣游衍秋色淒以清深懷託所遣回

日言卷五十三  
七  
颺振叢樾閒雲入幽巘眷言二三友同心自繾綣垂楊  
十里陰清流一溪轉稍憩初地偏頓覺塵心遠歸鑣故  
夷猶移觴欲忘返何當置丘壑一笑謝軒冕

領郡出都留別諸君

明時忝嘉招薄游謝遠度孤衷夙寡諧恬漠有遐慕結  
交二三子實以賢豪故覽古窮皇墳摛華託豪素本乏  
希世資還甘守遲暮襍被辭舊廬分襟阻清晤徘徊戀  
餘樽慷慨即長路

雲崢丈邀登清源山

出門欲看山山翠忽在眼俄從平野登旋傍迴溪轉層  
崖屢攀緣仄徑縱凌緬雲氣抱石幽烟霏隔林淺地  
何風流開尊向絕巘情同永嘉適藻擬宣城撰塵蹤有  
離析高情自繾綣執手千古懷茲山亦齊峴

元日記事

曉飾嚴城禁宵傳獄市驚閉門空大索出柙已橫行桃  
梗難除惡椒觴罷賀正爾曹堪一笑吾自掩柴荆

登北固山甘露寺

寺憶南朝古山橫北顧遙千峰圍鐵甕雙髻擁金焦隔  
岸維揚樹空江建業潮高樓信多景秋意獨蕭條

寺有多景樓

江行

江樹浮疑沒江雲散復凝疎燈明極浦處處有魚罾

徐三重二首

三重字伯同松江華亭人萬曆丁丑進士除刑部主事有天真齋草

詩話伯同甫舍雞舌遽返鶴沙息軌杜門研朱讀易其叔子禎稷出守夔州畏家誡之嚴不寄一物賦詩云丙穴有魚堪作鱠因風不敢寄高堂足徵其守之介矣

送友掌教射洪 二首

莫歎青羶作客寒聖朝猶是重儒官鼎烹鼎食知多少誰似先生苜蓿盤

江流欲盡是巴西巫峽荆門烟樹迷遙計客帆行到處亂山斜日子規啼

張敬 二首

敬字爾和淄川人萬曆丁丑進士除中書舍人

遷禮部主事有儀部集

詩話明初駙馬家有學錄嘉靖六年以禮部主事金克厚授都尉謝詔經書後遂因之主事教習駙馬者爾和其一也爾和不以詩名所作寥寥附文集之末聲律未能悉諧然頗有生趣如曇花侵斷壁木葉響空廊鷺下啄寒葦猿垂颺古藤故人滄海隔歸夢白雲深亦自流暢

聞鴈寄王侍史

搖落聞征鴈連翩向海隅行分絕塞闊影入夕陽初鼓角寒城急關河短鬢疎那能千里別不寄一封書

寄王汝賓

山房黏石壁蒼翠暮烟收野水亂流合沙禽幾點浮人歸柵葉寺月映蘆花洲白露澄江闊故園何處秋

朱應轂 二首

應轂字德載濬縣人萬曆丁丑進士除東阿知

縣擢貴州道御史尋改山東道御史巡按貴州  
再改雲南道御史巡按淮揚卒于官有槐石集

詩話德載近體  
亦自羅羅清疎

### 中秋登東阿城樓

東郡逢佳節南樓上小梯牕迎歸鴈近坐覺遠峰低魏  
闕燕山北黎陽魯甸西清輝真可戀不寐信烏啼

### 東流泉

清流環曲徑翠色映遙岑山靜少人跡林深多鳥音雨  
餘雲破練月上酒浮金千里來知己同游愜素心

鄧汝楫 二首

汝楫字原剡江陰人萬曆己卯舉人官慈利知

### 縣調龍門

### 晚行

澧上驅車晚前途日已傾寒禽依古木山鬼瞰荒坪路  
入邨烟直燈分野燒明不勝寥落恨况復歲華更

### 將至清源作

清源看不遠暮色遂征塗寒入蕭蕭樹身隨汎汎鳧扁  
舟漁火亂明月水天孤苦受微官縛高陽媿酒徒

張修德 一首

修德字季成江陰人萬曆己卯舉人

### 下第歸兗州道中遇雨

雨橫風狂三月天長塗游子倍潛然鄉心對酒渾無賴

倦馬衝泥苦不前委地落花空寂寂隨人舞燕故翩翩  
自憐輸却山牕客一枕玄經日晏眠

馮大受 一首

大受字咸甫松江華亭人萬曆己卯舉人有竹  
素園詩集

登岱

直上中峰頂方知泰岱尊岡巒迴地軸星斗挂天門孤  
嶂秦皇碣清池玉女盆仙人雲外度白鶴日飛翻

黃克纘 一首

克纘字紹夫晉江人萬曆庚辰進士除壽州知  
州入為刑部員外累官太子太保兵刑工吏四

部尚書有數馬集

將出都門和潘王見懷韻

平臺跋履憶當年榆莢楊花四月天授簡總慚枚叔賦  
耽詩獨記楚王賢寒嘶匹馬春明外晴落孤鴻魏闕前  
南去虔州千萬里薊門章水各風烟

許弘綱 一首

弘綱字張之東陽人萬曆庚辰進士除績溪知  
縣累官南京兵部尚書

丁酉再告

多病年來不耐官柴門柳色意中看偏於蓴菜思張翰  
自分圍棋老謝安長日生涯惟點易故人書問且加餐

畫溪烟雨春蓑綠重與君王乞釣竿

陸長庚 一首

長庚字元白平湖人萬曆庚辰進士知六安廣德二州升刑部員外進郎中改南吏部出爲湖廣參議歷官江西左布政使遷應天府尹南京通政司使

感興呈景陽兄

林藪原吾志年來遠市朝青山歸計穩白髮壯心凋夢逐翻風蝶名成覆鹿蕉小牕休沐暇閑步誦逍遙

龍膺 一首

膺字君御武陵人萬曆庚辰進士除徽州府推

官謫温州府學教授稍遷國子監博士升禮部主事復謫兩淮鹽運判官轉鞏昌通判歷同知遷南戶部員外郎進郎中出爲按察僉事歷參議副使仕至南京太常卿有九芝集

南歸聞鴈

征人家近住瀟湘楓葉初丹橘柚黃憑爾先將歸信寄莫言風雨隔衡陽

石崑玉 一首

崑玉字汝重黃梅人萬曆庚辰進士除戶部主事歷郎中出知饒州蘇州紹興三府升山東按察副使轉福建參政以右僉都御史巡撫大同



有石居士集

燈市

燈市百貨藪類聚還分局雜沓掩塵埃穹窿象山谷滿  
城恣意觀履舄時交觸側肩趁友朋轉盼遺童僕樓上  
樓下人徒倚自相矚佻佻白面郎囊裏金如粟訪古并  
探奇十僅償其六本擬快于心苟觀容有感為君話所  
從原出巨家積向購此場中而今在此鬻佇看市道間  
何事無翻覆物類火傳薪人寰風轉燭拚諸海陸珍權  
與豪華畜姑數杖頭錢來酣春酒熟

姜士昌 一首

士昌字仲文丹陽人萬曆庚辰進士除戶部

事歷員外郎中出為陝西提學副使遷參政卒

贈太嘗少卿有雪柏堂橐

春日郊行

金張亭館帝城邊北里南鄰競管絃山鳥日來游客醉

曲池芳草自年年

余 寅 二首

寅字君房一字僧杲鄆縣人萬曆庚辰進士除

工部主事轉禮部員外歷郎中出為陝西提學

副使遷山東參政入為太嘗少卿有農丈人集

詩話君房自負古文然與作者尚遠其於詩自謂涉其藩未窺其奧亦  
自知之明相傳少日夢人曰君命同孔子年至七十三無恙後二年奉  
川產一麟持獻太守太守使吏來白君房曰吾  
其死夫未幾果卒萬八處士斯同嘗語子云

魯橋邨

半景臨墟塢雙榆闢里門秋風吹巷陌落日喚雞豚野  
外桑麻闊山中父老尊喧喧邨釀集賽鼓正黃昏

送包明臣之任潮陽簿

七閩路盡是潮州莽蕩風烟漲海頭溪洞水腥常作霧  
枕榔葉暗不知秋琵琶洲畔蛟為窟甲子門前蜃是樓  
只有羅浮山色好蕭齋長得破羈愁

王德新一首

德新字應明安福人萬曆庚辰進士除南京兵  
部主事改刑部坐建言為民起補南工部遷光

祿寺丞有傲所先生集

王希泉云光祿韻密神怡  
珠熿玉輝歸然風人雅致

期登羅陽

羅浮烟雨滿空山千仞崖藤尚可攀煮石眠雲誰禁得  
律僧翻羨老夫閒

葉初春一首

初春字處元吳縣人世居洞庭自號吳西主人  
萬曆庚辰進士除廣州順德知縣擢兵科給事  
中歷戶禮二科左右給事建言為民天啓初追  
贈光祿寺少卿有吳西佚橐

詩話先太傅文恪公兩主鄉闈辛卯江西則吳西葉公為副丁酉南畿  
則福清葉公為副皆齊心一契關節不到者南昌徹棘之後葉公游燕  
必俱嘗借過鐵柱觀羽士言是許旌陽鎖蛟處先公以豫章城築自灌  
嬰而李白詩有浪動灌嬰井潯陽江上風之句辨此井即是滕公遺跡  
葉公大以為然先公賦五言有云潮生浪亦動疑是灌嬰井我言殊怪  
牒給事默心領蓋紀其事也既而先公掌容臺建儲之疏公私凡七十

上最激切者劾鄭國泰一章而定陵不以為忤葉公以爭豫教再疏去官進言固有幸不幸也葉氏流芳錄二卷載公疏草及門弟子輓詩公之韻語流傳特寡留別徐少南一律手書存少南族孫上舍悖復所楮墨漫漶以意補其闕字存之

梁谿留別徐少南

直北三千里郵籤第一程  
渾忘相送遠誰道別離輕  
驛火抽帆宿河水策馬行  
不知游子夢仍戀闔閭城

邢雲路一首

雲路字士登安肅人萬曆庚辰進士知繁昌汲  
臨汾三縣升兵部主事由員外出為河南僉事  
歷參議副使終按察使

西湖竹枝詞

裏湖外湖春水深  
斷橋不斷入湖心  
郎在外湖唱吳曲

妾在裏湖吟越吟

彭夢祖一首

夢祖字應壽全椒人萬曆庚辰進士除戶部主  
事歷員外郎中出知雲南府調南康升浙江按  
察副使進參政致仕有彭應壽集

登岱

空濛寶殿俯長天  
萬里中原亦緲然  
水落山根先入濟  
夜涼斗柄欲捎燕  
松陰曾濕秦時雨  
玉筴長封漢帝年  
好借西風為羽翰  
圖成五嶽杖頭懸

車大任 三首

大任字子仁邵陽人萬曆庚辰進士除南豐知

縣歷南禮部郎中出知福州嘉興二府升浙江按察副使進右參政有囊螢閣草

屠緯真云子仁詩色華而不豔音俊

而不靡妙得詩家所賞而不犯詩家所忌足稱擅場陳玉叔云子仁詩有風致而不傷于境有才情而不泥于氣和平温厚得古人之遺詩話子仁見賞于吳明卿明卿贈之詩曰靈均忼慨追三后太史憑陵陟九疑子仁深自喜也詩頗閒放無局促態

### 金谿苦雨

咫尺金谿道年來幾度過郵程千里急鄉夢五更多雨色迷芳草風聲走濁河泥塗軒冕意去住欲如何

### 送吳求叔還蒲圻

我留君且住盡日醉春醪作客修長缺歸心慰大刀片帆淮浦遠匹馬楚山高莫負重來約相思夢寐勞

### 與臨清武雙溪

十載相逢章水濱與君同醉異鄉春誰知今日清源道又向天涯別故人

### 素年 四首

年字子壽吳縣人萬曆庚辰進士除南京兵部主事歷員外郎中出知青州府遷江西按察副使轉雲南參政有觀槿齋集

詩話子壽五言雖少精詣不墜胥臺家法

### 白水道中

驅車上山巔俯瞰人如蟻及從澗底行仰觀亦同此地位有崇卑所見因乃爾林端宿鳥鳴天際浮雲起前村可息肩澄心會玄旨

荆江感懷

浩浩荆江流要渺望不極風雲倏迴翔日月自出沒勢  
合巫峽通地分吳楚圻豈不稱天險中原非所亟吳蜀  
多英雄交爭遂相迫豺虎白晝嗥吞噬安所惜烈士負  
孤忠震怒天為戚千載垂芳聲至今有餘赫臨流惻愴  
滋涕泗霑巾幘

豫讓祠

智伯已亡後誰復君父讎傷哉一豫讓寧為刺客流恩  
深國未報形毀心獨留成敗不足料慘辱非所憂願為  
知己殉恥同肉食謀橋下試一擊廁中仍再投藿粉志  
始畢此外庸何求嗟嗟二心人過此良足羞

雨宿一雲寺

蠟屐候新晴攜尊陟西嶺松間聒濤聲樹杪挂瀑影雲  
起日欲晡雨來山亦暝徑窄怯筇躋林寒覺衣冷言投  
方外居因嘗雨前茗堂懸燈一粟門擁墨千頃鳴禽寫  
幽泉頓使萬慮屏

楊于庭

一首

于庭字道行全椒人萬曆庚辰進士除濮州知  
州徵授戶部員外轉兵部郎中有楊道行集

贈李修吾轉南祠部

見說君王已賜環金陵亦在五雲間兩都爭識神仙吏  
三禮仍居侍從班伏枕鄉心懸碣石挂帆秋色照鍾山

謝公墩上重回首絕代風流尚可攀

董嗣成 六首

嗣成字伯念烏程人萬曆庚辰進士除禮部主事歷員外郎中建言削籍有青棠集

謝在杭云伯念古選憲章陶謝

近體沐浴岑王如貌  
姑射仙人餐風飲瀣

詠懷

高臺多悲風深坻多秋草  
男子志不伸咄咄縈懷抱  
盛年不可留誰能常壽考  
尚平游名山婚嫁苦不早  
我思采紫芝逍遙以終老

湖中夜泊效謝體

落日沉遠樹寒烟出孤城  
湖中鷓鴣起沙際蟋蟀鳴  
社

鼓發初響漁燈漾微明  
遙岑漸以沒但見蒼烟平  
空水饒雨色雲林散秋聲  
未深宋玉悲良懷遠公盟  
獨步縱遐矚曠焉寄微情

發青陽驛

條風啓征塗于邁自旭日  
旦覽古舒遠懷解紱謝微絆  
廣衢殘雪開遙甸芳蕙散遠  
揚旣載敷谷禽亦時轉尚游  
達者心點狂聖所贊唐風詠  
山樞感物有餘歎

嚴道澈過訪不值寄懷

河漢光皎皎照我彈鳴琴  
寂寂感物候白露霑我襟  
絃絕不復調良夜空沉沉  
抱此孤桐還藉以寄知音

賦得關山月

晚角開金鏡清笳落曉鈎關河今夕影迢遞幾人愁瀚  
海殘冬夜平沙古戍樓誰能歌出塞腸斷玉京秋

渡江

搖落長干道淒涼楓葉丹殘霞連海盡細雨入江寒楚  
樹帆前沒吳山夢裏看鄉關悵回首長路正漫漫

臧懋循

四首

懋循字晉叔長興人萬曆庚辰進士官南京國  
子監博士有負苞堂詩選

詩話何元朗臧晉叔皆精曲律元朗評施君美幽閨出高則誠琵琶之  
上王元美目為好奇之過晉叔謂琵琶梁州序念奴嬌序二曲不類則  
誠口吻當是後人竄入元美大不以為然津津稱謂不置晉叔笑曰是  
惡知所謂幽閨者哉嘗從黃州劉延伯借元人雜劇二百五十種又購  
得楊廉夫仙游夢游俠游冥游彈詞悉鏤板以行序言鄭若庸玉玦張  
伯起紅拂等記用類書為傳奇屠長卿曇花道白終折無一曲梁伯龍  
浣紗梅禹金玉合道白終本無一散語均非是且言汪伯玉南曲失之  
靡徐文長北曲失之鄙惟湯義仍庶幾近之而失之疎其持論斷斷不  
爽詩亦不墮七子之習故雖從元美譙  
游不入四十子之目亦磊落之士也

送茅孝若應舉

握手離堂夕椒盤與菜盤春風吹遠道游子入長安玉  
躡裝詩軸黃金飾馬鞍桂枝行可掇計日為彈冠

得吳載伯書却寄

昔有三秋鴈曾傳萬里書開緘先涕淚跪讀更何如白  
髮添愁鏡黃金罄客居不知相見日還隔幾年餘

望亭夜泊

向暝投何所依微識望亭客舟今復至津路昔曾經瑟  
瑟風吟樹離離鴈度汀翻令鄉思逼數起視明星

答汪仲嘉

客路經春侶伴稀故鄉回首淚霑衣不知若箇吹長笛  
一夜梅花似雪飛

章嘉楨

四首

嘉楨字元禮德清人萬曆庚辰進士累官大理  
寺丞有姑孰集南征集中林草

書座右

見鹿指成馬聞蟻以為牛明乃戒獨任聰亦何深求谷  
風方習習草萎萬木秋瞻彼江漢波鱗甲鮮安流我愛  
曹平陽醇酒以忘憂

三湖

丹陽石  
白固城

水落三湖滙洲渚若阡陌水至三湖連彌天浩浩白怒  
濤漂田廬驚風斷塍埒豈無賴霞照觀之慘曾臆亦有  
蓮與芰不克飢者食民力疲堤工民命寄河伯湛酤湖  
之陰精禋冀昭假

齊雲山下溪行

白岳朝真罷乘桴下小溪急湍清見底芳草踏成蹊傷  
樹山樓出眠鷗浦澈低不須歌越調落日到城西

勸農

溪邊千嶂朝含雨竹杪一鳩午喚晴雲漏日明油壁暖  
吏人打鼓勸春耕

張

恒

十三首



恒字伯常蘇州嘉定人萬曆庚辰進士知茶陵  
興國二州入為刑部員外郎出知饒州府再知  
建昌歷按察副使升太嘗少卿有明志藁

詩話伯常自序其詩謂語不必工意不必遠古不必合今不必離生不必名沒不必傳聊明吾志而已矣又曰譬諸侯至而物鳴若有使之而不能已者以寫其優柔憺蕩之思數語非知詩者莫能言也宜其古風磊落近體亦安詳比於同邑四先生似覺挺拔

### 合歡詩

庭前雙瓊樹嘉實何離離鳳皇忽來巢載鳴復載飛鳥  
常比其翼樹亦連其枝宛若夫與婦燕爾良亦宜綢繆  
結深心嫵婉要終期登樓操瑟琴音響一何諧人生在  
志合豈必及宴私和德家乃昌泰交亦若斯

### 百感詩

六首

渚鴻不登木蓼蟲不集芥物性寧可移足已復何待處  
卑夷即適茹苦習亦快魯享爰居悲衛軒野鶴駭藿食  
而衡棲自顧亦云太處身勿靳高但置風塵外

射于生山頭挺幹故不長叢蘭發澗底隨時播幽香高  
下殊所託物性自有常富貴多疵辱貧賤愉且康負乘  
為寇媒考槃古所臧素心苟無瑕跼伏道彌光

富貴世所希不如賤與貧得喪在須臾轉盼殊戚欣居  
卑無隕墜處約離垢紛賜憲既異軌管華豈同倫丘園  
有餘賁抗志罔不伸揚衡閱世俗營營多僂民

肅后秉睿哲於赫振乾剛永嘉既爰立密勿謨孔良言  
念撫鎮臣縉紳雜貂璫一朝決宸衷峻此閤寺防悉令

還埽除無使穢封疆厥謀貽神孫昭然垂典常猛虎入  
柙中縱之騁康莊祖武近可繩聖心應不忘  
青蠅何營營趨利百其孔採權徧山海方輿為之動妖  
狐導猛虎城市日接踵帑金高於山源竭川流壅大決  
誰為防哲士心獨恐盡吸羣民脂蒿目悲林總渙居寧  
可期滿覆胡弗悚

宣聖昔惡佞末俗佞乃尊小佞佞以言大佞佞以文富  
貴止好諛工拙不復分諛生眩屏幃諛死媚丘墳稱引  
豈不工清論淆且焚哀之費緇帙曷若烈火焚

仲夏偕阮步文孫子極遊麻姑山

良遊信多幸申約晨忽霽采真實天假選勝情亦銳攀  
陟凌烟空雲霞生衣袂古壇隱松間紅泉響天際曠焉  
見田疇知否有井稅已覺雞犬殊時聞鸛鶴唳神仙何  
悠悠人代倏云逝千秋不可知遐覽有深契暮野烟霏  
霏宵巖星曄曄幽討愜予懷世緣脫如篲

步文子極偕游從姑

峩峩靈峰石雙拆若初判鑿磴纔受趾陟崖迴迫面鍾  
磬出雲端杖屨入天半眷此清和月萬象俱蔥蒨日晃  
搖沙金林疎出江練蜿蜒圍暮嶺森錯分晴甸軍山聳  
孤髻麻瀑飛一綫俯視何蒼茫俄頃嵐光變古今杳相  
接登覽時哲換嘉會洽懽悰長懷託文翰

荊州

迢遞長征客徘徊故郢墟風烟平野闊沙月大江虛峽  
近啼後切天寒落鴈疎蕭蕭荒草遍惆悵楚宮餘

憶槎上舊居

千古浮槎處吾廬乃在茲雲沙重護宅潮汐宛通池野  
鳥啼花徑漁人唱竹枝白衣諸故老伏臘互傳卮

喜雨

赤黠驕何甚辛勤父老情民惟依稼穡身可代犧牲雨  
應迎龍至雷和賽鼓鳴自非天澤徧何以謝蒼生

涼州詞

壚頭酒熟葡萄香馬足春深苜蓿長醉聽古來橫吹曲  
雄心一片在西涼

張萱 六首

萱字孟奇博羅人萬曆壬午舉人授殿閣中書  
歷戶部郎中有西園全集

詩話孟奇熟於典故周見洽聞著書頗多其在西清重編文淵閣  
書目具載卷帙補前人之闕漏惜乎香廚所存已失其什九矣

茱萸灣懷古

茱萸灣頭蘆荻花秋風高日蒸紅霞夜深打鼓負鹽去  
潮平軋軋鳴歸艤竹西歌吹杳何許垂楊兩岸黯不語  
一聲江笛叫江樓劃斷寒雲不知處

邗溝懷古

不盡邗溝水微茫日夜流潮連楊子渡烟接海門秋樹  
影浮荒堞蟬聲到客舟興亡無限意落木共悠悠

過亡友韓伯舉故居

主營依難弟遺文起後人一生唯好客到死不言貧  
門巷渾如昨池臺倏已新青山空滿地痛絕未埋身

贈馮慕岡華省衷何玉峴南還

往事誠顛覆今皇自聖明孤臣瀕萬死中詔賜餘生  
司馬能逃腐弘羊正待烹已聞干象緯不用借公卿

自廣濟至激水

峭帆斜日挂危檣疊鼓呼風亦太忙却聽舟人話潮信  
欲乘新月汎錢唐

漁村

籬堤時築亦時崩野水曾侵竹幾層一任漁郎竹根宿

夜歸猶得借漁燈

何三畏 二首

三畏字士抑松江華亭人萬曆壬午中順天鄉

試選授紹興推官有芝園居廬集鳳山拜石堂

橐

陶周望云士抑詩備諸體不專一家 唐元微云士抑揚花風雅  
有餘蘊綜敘今古有餘采辨晰名理有餘味 董思白云士抑居

廬詩如哀將勞鴈  
使人聞而泣下

贈蘇爾宣卜居吳門

金閭南市北市虎阜前山後山天色不風不雨先生獨

往獨還

金山寺口占示徐澤夫兼寄諸友

先是澤夫北行余同友人  
餞席至是乃同發

金山頂上三竿日楊子江頭一度春記得故鄉同送別

如今也別故鄉人

來知德 二首

知德字矣鮮梁山人萬曆壬午舉人以薦授翰林待詔有釜山詩集

詩話待詔歌鹿鳴諸書不詳年歲詢之蜀人言是嘉靖中而黃徵君俞邵分撰明史藝文志注云萬曆壬午或有所據姑從之俟再考相傳待詔隱萬縣之求溪二十九年注易始就今其書盛行而詩非專務易義亦非創獲蓋僻在一隅罕見羣儒之論述此自信之過遂蔑視諸先輩耳

春風辭 二首

春風起子花殘有美人子江干三年不見子路漫漫遠  
莫贈子木難歲崢嶸子將暮心惆悵而難言及榮華之  
未落曷不驂夫翠鸞使我執手子盤桓

春風起子花落有美人子江閣三年不見子路沙漠遠  
莫致子金錯日窅窅子下山竹紛紛子解籜及青春之  
未徂曷不跨夫黃鵠使我竝坐子偕樂

明詩綜卷五十三

十三

前美人平云關三平  
不山外然會  
又青  
...

